

嘯亭雜

清禮親王昭槤著

錄

第二冊

進步書局校印



嘯亭雜錄卷之五

清 汲修主人著

緬甸歸誠本末

緬夷古朱波地。自古不通中國。宋寧宗時。史志始有其名。元世祖遣兵三征之。責其貢賦而還。明初設宣慰司。聊以羈縻。間亦嘗修貢賦而還。其事詳正史。其時緬地不過數千里。附近之提涼猛養猛拱猛密司蠻暮木邦落卓來卡猛迺擁會金坎母得馬大山宋賽錫箔猛樟猛素孟良整欠整賣諸大土司。尚非所有。及莽體瑞之子莽應裡。漸強盛。明所設三宣六慰。大抵皆服屬於緬。本朝順治十五年。大兵破貴州。明主由榔奔緬甸。時定西將軍受星阿吳三桂等。於十八年十一月入緬。師至木邦。白文選降於茶山。康熙元年。緬酋自相篡弒。殺明宗室。及黔國公沐天波等數百人。將軍等索明主。緬人不與。師至阿瓦。緬人懼。遂獻明主。師歸。緬人遂不通朝貢。其世次亦不可考。至雍正九年。緬酋與整邁構兵。緬目蟒古叮。在九龍江。遇守備燕鳴春。有告知國王。明年進貢之語。鄂文端公以聞。得旨宜聽其自然。不必有意設法誘致。乾隆十一年。開茂隆廠。雲南永昌順寧。徼外有狽狽。其地北接耿馬土司。西接

木邦界南接生狚狃界。東接孟艮土司界。地方二千餘里。其長曰蚌筑。自號葫蘆王。不知其所自始。有世傳鐵印。緬文曰法龍湫。諸木隆華。言大小箐之長也。所居木城。草房。戴金葉帽。似盔。穿花衣。俱跣足。夷民山居穴處。以布纏頭。敝衣短褲。刀耕火種。軍器惟刀鏢弓弩。又有夷目蚌坎。幸猛莽恩恭。悶俱係蚌筑弟兄叔姪。分掌地方。亦不屬於緬酋。免耿馬土司罕世屏代稟稱。願歸順境內。茂隆廠自前明開採時甚旺。廠民吳尚賢等議給山水租銀。不敢受。請照內地廠例。抽課報稅。以作貢物。總督張允隨奏言。葫蘆乃係化外野夷。輸誠內附。請將此項廠課。飭令減半抽收。一半賞給該酋長。以慰遠人之心。得旨允行。十三年。鎮康土司刀悶鼎報。緬夷願通職貢。不許。十四年二月。茂隆廠吳尚賢入緬甸。先是迤西道承差賈興儒。奉差往茂隆廠。訪緝廠犯鄒啟周張寬果等。茂隆廠委吳尚賢。於十二月丙戌。派帶練兵一百餘人。分起前往訪緝。壬辰。吳尚賢帶練兵八百餘人。賈興儒隨同自廠起身。癸卯。至幹猛。十五年正月朔日乙巳。廠練已擒鄒張二犯。至幹猛。押解回廠。吳尚賢帶練兵一千二百餘人。前赴緬甸。時上年緬人所遣土目五人。請進貢者。尚在鎮康。吳尚賢要令前導。丁未。自幹猛起程。庚戌。至木邦。木邦令頭目猛占等八十餘人從之。丁巳。至錫箔。

庚子。至宋賽。吳尚賢等於所過土司地方。皆有餽遺。遂致書於貴家。貴家者。隨明主入緬之官族。其子孫淪於緬。自署曰貴家。據波龍廠採銀。貴家頭目宮裡雁素與緬甸有隙。因率兵阻之。吳尚賢至麻里脚洪。又遣人致書講和。貴家羈其來使。吳尚賢遂會緬兵三千餘人。至德嶺城。與貴家數挑戰。三月庚戌。貴家出迎敵。詐敗。吳尚賢前赴之。為貴家所敗。緬甸復遣人和解之。吳尚賢渡麻里脚洪回廠。賈興儒於五月癸丑。帶張寬果回大理。尚賢意欲邀功。因謀說緬酋莽達拉。遣使入貢。莽亦荒淫無道。眾叛親離。遂從其言。具表來降。十五年七月。葫蘆茂隆廠課長吳尚賢稟稱。緬甸國王莽達拉。情願稱臣納貢。永作外藩。命工匠製造金銀二鈔。篆刻表文。又造貼金寶塔。裝載黃亭毡。緞緬布土物。各色馴象八隻入貢。又貢皇太后馴象二隻。毡緞緬布等物。差被國大臣一員。頭目四人。象奴夷眾數十人。出境過江。於四月已抵邊界。請代奏。督撫令司道會議。布政使宮爾勸會按察使糧鹽。迤東迤西四道議。以前鎮康土州刀悶鼎稟報。緬酋請通貢已不許。今稟內絕不言及。且明置緬甸宣慰司。表內未稱宣慰舊銜。又有蟻穴自封夜郎天外之言。更不敘明使臣銜名。吳尚賢前稟與今稟。又復互異。至木邦乃緬甸所轄。中外攸分。准木邦投誠。木邦即緬甸之叛

逆必至大起釁端。亦有妨於國體。吳尚賢初到廠地。恃強凌弱。今率緬甸來歸。實有邀功之意。且外國歸誠。亦斷無借一廠民為媒。進將來緬甸設有寇警。必另求援兵。不應則失統御之體。應之則苦師旅之煩。恐鞭長莫及。反難善處。况前明頻通賦貢。受侵擾者數十年。我朝久置包荒。獲寧謐者百餘載。邊境之救寧。原不關乎遠人之賓服。其不可信及不可行者各四。而巡撫圖爾炳阿。竟據稟詞並表文入告。表文曰。緬甸國王莽達拉謹奏。盛朝統御中外。九服承流。如日。月經躔。陽春煦物。無有遠近。羣樂甄陶。至我皇上。德隆三極。道總百王。洋溢聲名。萬邦率服。緬甸近在邊徼。河清海晏。物阜民和。知中國之有聖人。臣等願充外藩。備物致貢。祈准起程。由滇赴京。仰觀天顏。欽聆諭旨。云云。十六年六月。得旨。准貢。凡筵宴賞賚。一應接待事宜。俱照各國王貢使之例。以示綏懷。因遣官伴使赴京入貢。至十月。貢使回滇。尋逮吳尚賢。尚賢本無籍馬脚於茂隆山開廠。督臣張允隨僉委充當課長。積私財捐通判職銜於廠地。製造鎗刀弓弩。張黃蓋以自豪。年來侵首長賞銀三萬二千餘兩。前誣鄒啟周搶掠外域。致死。後令楊公四等於廠外地。鎗斃客民彭錫爵。經屍弟彭錫傑控告。是歲充通事隨緬使入貢。於途挾重賫。招搖生事。總督愛必達奏請

革職於十六年九月。拏審擬大辟。旨未下。瘐死於獄。十七年三月。敏家攻阿瓦。破其城。上年十一月。緬國貢使回抵耿馬。即聞滾弄江外有警。十二月。耿馬土司罕國楷遣人伴送緬使至木邦。先是六月內。緬酋遣子糯喇他蟒左。同弟色亢瑞凍。至猛迺城迎貢使未至。是年三月。敏家破阿瓦城。以率敏拖五八喇扎居之。緬酋避居約提。即曼撒壩等處。居無定所。其子糯喇他蟒左。亦避居錫箔。四月。緬使抵猛迺。搭建亭閣貯勅旨。御賜欲俟其國平定始旋。十八年九月丙寅。木梳頭人甕藉牙與貴家戰勝之。乃令貴家及約提即之兵共五千人圍敏家。又景賣卡普幹官之子占朶蟒率眾至猛迺。亦欲據緬。十九年正月。緬使及緬酋子遣人齎蒲葉書至耿馬。未及回國。緬酋莽達拉即為得楞錫箔所殺。子色亢瑞凍出奔。緬國無主。甕藉牙起兵。聲言復仇。糾合緬屬各土司。擊敗得楞諸夷。遂自立於木梳城。尋徙阿瓦。凡緬國舊屬土司皆遣人降服之。有不服者。輒治兵攻擊無虛日。貴家據波龍廠採銀。向有歲幣。至是不復輸。甕藉牙擊潰之。追至猛迺。獲所貯勅書。御賜遣人四出求緬酋。子色亢瑞凍避入木邦。甕藉牙追之。二十年六月。耿馬孟定等土司以木邦警聞。十月辛亥。色亢瑞凍挈妻喇打那疊玉及親屬頭目男婦等八十餘人。緬僧二人。渡江。

入猛卯。總督愛必達巡撫郭一裕會檄猛卯土司衍珣遣之使去。越二日始出境。甕藉牙猶遣人在木邦城徵象隻索童女。木邦土司罕蟒底乃置色允瑞凍於滾弄江內。二十一年二月復遷至蠻弄寨。建草樓數楹。夷衆挈盒餽饗。馬益逼近內地之耿馬鎮康。督撫會檄防禦甚嚴。六月壬辰景賣屬之猛放緬目波顛遣老緬四人來迎。色允瑞凍遂挈家由白沙水渡滾弄江而南。波顛率衆五十餘人迎赴猛放。猛放至木邦計三十餘程。此後遂莫知其蹤。二十三年二月緬首甕藉牙攻陷木邦。木邦在耿馬外。為耿馬孟定鎮康孟連之藩籬。落卓土司地大而強。甕藉牙據有阿瓦落卓首先歸附。於是甕藉牙寇劫波龍廠。遂威脇木邦。索其賄。貴家宮裡雁與結些國人糾約廠衆。至木梳舖。劫殺兵始退。時緬首莽達喇之族弟占朶莽者。先分居景邁宮裡雁。遙附應之。十二月宮裡雁謀攻落卓。會占朶莽及木邦土官之弟罕黑。至落卓。劫殺落卓大敗。復引緬首甕藉牙及各土酋之兵謀攻貴家及木邦。以泄其忿。二十四年三月落卓先鋒兵六千餘人至腊戍。是時占朶莽率猛交兵一千人駐猛迺。乘落卓兵練遠出。間道已赴落卓。木邦土司罕蟒底聞緬甸落卓兵至。乃屯發練堵禦。遂遷其家屬於大橋邦。囊翼日與宮裡雁出白小坡與落卓決戰。越二日木邦城

陷罕蟒底奔蟒憂。家屬渡滾弄江。至那離。又遷於錫峨。緬兵入踞木邦。人民逃竄。波龍廠衆多歸於內地。沿邊土司撥練防守。宮裡雁率兵練男婦二千餘人。渡滾弄江。奔蠻東蠻弄。勢甚窮蹙。又由白沙水駐南湖。欲假道孟良。耿馬往犴狔。狔求占朶蟒所在。會兵復戰。而占朶蟒已襲破落卓。率兵練還救木邦。木邦復定。罕蟒底宮裡雁復渡江回永昌。鎮府聞報。率兵二百名。於四月辛酉出禦。行抵姚關。旋即撤回。二十五年。緬酋瓊藉牙死。其子莽紀覺嗣。與各部構兵如故。二十七年正月。宮裡雁被緬酋追殺甚急。由猛榜奔至耿馬。又由孟定之邦模南板入莽旦。窮蹙無歸。五月丁酉。至猛戛。並至孟連之猛尹。散處各村寨。初。宮裡雁自阿瓦奔出。帶練一千三百人。至木邦。撥給占朶莽五百人。實止帶練八百人。又脇從阿瓦緬子。木邦獯夷及擄掠男婦共三千餘人。既抵猛尹。猛尹頭目率衆驅之。宮裡雁乞內附。寄住孟連地方。孟連土司刀派春遂赴猛尹收其兵器。戶索銀三兩。將其衆安插於猛尹。各圍寨。宮裡雁不欲受土司管轄。已相嗟怨。總督吳達善知其有七寶鞍。乃亡明至寶。太監王坤由北京內庫竊去者。向其索取。宮裡雁以其祖宗所傳重物。怯不與。吳遂挈其妾婢六人。赴石牛廠。刀派春率宮裡雁之妻孥。占及男婦一千餘人。至孟連城。刀派春又向

擄占及頭目撒拉朶。索牛馬童女。以賄吳達善。擄占忿。於閏五月丁丑夜。糾眾焚殺孟連城。刀派春家屬三十餘人。俱被害。逃免者僅應襲。刀派先及刀派春妾二人。戊寅。擄占撒拉朶率眾逃散。至猛養犴犴各處。刀派春族兄刀派英聞變。率練追剿。而猛養犴犴兩處夷眾亦各要路劫殺。擄占大敗。逃竄無踪。派英寄信石牛廠民龍得位王天和等。將宮裡雁好為欸留。宮裡雁實不知也。七月。永昌守楊重毅檄耿馬土司罕國楷帶練誘擒宮裡雁。並其妾婢六人。及另行拏獲之餘黨阿占阿九二人。囚解赴省。布政使姚永泰曰。孟連之變。雁不與知。况其夫妻不睦。雁是以避居兩地。今若留雁。可以為緬首之忌憚。不可代敵戮仇也。按察使張坦麟審稱。宮裡雁雖堅供不知情。但勢窮來歸。先令妻屬詭計歸服。以致其劫掠罪有攸歸。且連年與緬酋據殺。既經拏獲。斷不可仍留夷地之害。應正法。吳達善以前鞍不與。故切齒於雁。遂左袒張議。適緬酋至木邦。聲言前往整欠景線相戰。因遣頭目蟒散至孟連索宮裡雁所脇從之緬人刀派永。悉將緬眾遣回。益知內地虛實。十月丁未。殺宮裡雁以其妾婢分給功臣。吳達善既遂其志。乃檄緬人諭以宮裡雁業經誅殺。宮裡雁之妻擄占及兇目等。當即拏送。以靖餘孽。時擄占已嫁莽酋弟。憎駭。故緬人以為有心羞指其

淫行。益加忿恨。會木邦罕黑勾結。遂滋擾內地之耿馬。耿馬雖屬內地。於緬亦有歲幣。緬目普拉布。率兵來索。闖入孟定。執土司罕大興。兵及茂隆。厥時永順鎮田允中。調隣近各營官兵。親率進剿。吳達善恐其連兵。致敗露其前事。乃飛檄田鎮。責其輕率。遂還師。耿馬土司罕國楷。率兵禦緬於石牛廠。厥委周德會。聞田允中進發。恃為屏障。率其廠練於滾弄江。截緬人歸路。擊殺普拉布。吳達善以周德會為殺良冒功。竟置之於法。而緬人益輕中國。二十八年十一月。緬人犯猛籠。莽紀覺既兼并諸土司。東之景線。整賣孟良。整欠。皆以力戰迫脇附從。復言普洱之十三版納。原隸緬甸。遣播定。昨寄緬文於車里。宣慰司。索其貢獻。率賊眾至打樂隘口。猛遮撥練禦之。遂犯猛籠。刦掠村寨。猛籠不能禦。土弁乃占召彝等被害。普洱鎮劉德成領兵至。思茅遣兵前赴九龍江。吳達善飭調元江土練未至。次年春。緬賊始退。時復分兵至我遮放邊外。揚言來索木邦官。吳達善畏蕙。惟戒官兵不與之戰而已。會莽紀覺病死。賊乃退。三十年。莽紀覺死。其弟憎駁嗣。時賊勢愈肆。強橫。其西之結些。南之白古大。姑拉。小姑拉。悉為其所據。是年賊犯普洱。普洱在省城之西南。幅員遼闊。與緬甸之孟良。猛勇。整欠。接壤。南通南掌。所屬有九龍江。車里。宣慰司。及倚邦。土守備六。困土。

守備猛遮土千總普藤土千總猛阿猛籠猛腊猛旺整董猛烏烏得土把總大小十三土司俗稱十三猛又稱十三版納其間九龍江猛遮猛阿猛籠猛腊並猛遮所屬之猛海及九龍江所屬之橄欖壩小猛崙猛彝補角等處均逼近外域上年九月匪首召播率眾一百三十餘人至九龍江要車里宣慰司前赴阿瓦會盟時吳達善已調陝甘總督為劉藻老儒也不識事體以王者須正疆理為言命驅逐之明年春賊人飽颺始去五月賊眾復由整欠渡九龍江至猛腊烏得猛烏整董猛旺各土弁率眾驅逐賊踞猛腊猛彝普洱鎮劉德成遣土目擒獲賊目叭信波半阿浥等解審正法是時緬酋雖恣肆亦不敢抗官兵實遣人於十三猛索賦十三猛係雍正年招降而亦輸賦於緬叭信三人傳為在十三猛之貿易人悉殲之賊因憤而思逞十月緬賊復由整欠入猛彝整欠頭目召教其子召淵與車里宣慰司為一族車里所轄之猛彝頭目叭先彝召教惡其不遜遂糾緬賊攻之孟良頭目召丙召散以同祖弟兄分掌其地召丙逐召散召散約頭目召猛照同攻召丙召丙逃入內地之鎮沅府乞降召散遂有孟良之地後結緬賊追逐召丙於是緬賊益出入九龍江一帶矣十月提督達啟由會城巡閱赴普洱十一月抵普城即聞賊耗普洱鎮劉德成率本鎮兵

八百名前往思茅一帶彈壓。提督移知總督。亦前往劉藻。即移兵茨通。提督達啟亦進駐思茅。劉藻聞緬人入犯。先遣後營遊擊明浩齎銀三千兩備犒。復遣標兵八百人。以甫抵任八日之叅將何瓊詔及員弁三十八人率之。前往援剿。時緬賊西由孟艮入打樂。至猛遮九龍江。東由整欠至整哈渡。至檄攬壩。猛阿之整控渡亦復有賊。達啟分兵四出堵禦。何瓊詔明浩及守備楊崐帶兵一百人。前赴猛阿。何瓊詔等素無備。止於江干。守備楊崐率四十人。於子刻先濟整控渡。何瓊詔等從之。至午刻。官兵悉渡。甫行數里。而楊崐兵已覆。瓊詔兵猝遇賊。各倉皇避匿。劉藻遂以何瓊詔陣亡入告。而何瓊詔及軍眾等。後先由威遠所屬蒙撒江歸。劉藻復以聞。上察其詐。切責督臣。命鞠瓊詔等。三十一年。總督劉藻自殺。劉自遣標兵後。屢接提鎮啟稟。知賊勢已猖。欲躬往。按察使良卿復從臾之。止挈丞令陳元震唐思等數員。午夜猝發。於除夕抵普洱。進駐思茅。乃檄調各營兵數千。是時瓊詔等已失事。賊勢日熾。傳烽逼近思茅城。劉乃退於普洱府治。劉本懦弱。既已前奏失旨。時分調各路兵之機。時發時止。人莫知所從。以致漫無經畫。會上以陝甘總督楊應琚調任。而降劉為巡撫。劉益懼。無所措手足。因於三月癸酉。中夜挑燈默坐。驅侍者出。自剄不殊。宛

轉於牀榻間。七日乃死。三月所調兵已集。楚姚鎮華封具報。以召丙為嚮導。率兵由猛遮克孟艮。召散逃遁無踪。普洱鎮劉德成具報。以叻先彝為嚮導。率兵由橄欖壩至猛彝。副將孫爾桂具報。由車里至猛籠。會攻整欠克之。召教降。提督達啟由猛籠攻猛勇。召齊降。時瘴癘大作。賊眾亦退。是月丙戌。總督楊應琚至普洱。是日以捷聞。請賞給召丙叻先彝三品指揮使職銜。管理土務。孟艮整欠各留兵八百名。猛散留兵二百名駐守。五月提督達啟卒於軍。啟捍禦邊城頗有勞績。時在孟艮受瘴癘卒。滇人思之。賓從無一存者。以李勳代。李至數月亦受瘴卒。九月猛龍沙人暨猛勇補哈猛撒等相繼內附。而總兵華封復招撫景線整賣孟艮小頭目等。詣軍門投誠。是年四月楊應琚既綏定普洱。回省城以前巡撫常鈞有莽案事畢即辦木匪之奏。爰飭調文武及習熟外域情形者。至省商辦。騰越副將趙宏榜首陳木邦蠻暮各土司願內附。緬酋勢孤易取狀。騰越之西南為南甸干崖蓋達三土司。是即所稱三宣者。為騰越之屏翰。三宣之外為蠻暮。蠻暮之西為戛鳩。猛拱。猛養。東為猛密波龍。自騰越關外。復有止丹弄種各山寨。野人族類甚繁。是時聞各土司樂於內附。又傳言。憎駁之母。勸其子臣服。時有機可乘。趙宏榜楚人少為波龍廠丁。習緬事。野人頭目。

皆與之善。總督楊應琚初弗聽。曰：吾官至一品，年逾七十，復何求，而以貪功開邊釁乎？趙宏榜復慫恿之。楊信其言。於是令道鎮府州官各議。迤西道陳作梅、永順鎮總兵烏爾登額、永昌知府陳大呂，皆議以賊勢甚大，邊釁不可開，騰越知州陳廷獻則銳意進取。楊應琚怒阻議者。陳大呂懼，改初議。烏爾登額阻益力。書凡七上。楊滋不悅。而陳大呂、陳廷獻革職。開化同知陳元震即馳檄緬甸，號稱合各國精兵五十萬，大砲千尊，有大樹將軍統領，以震懾之。又密布牒，分遣通事。至各土司說降。初，楊應琚議檄調官兵八千人。至是祇調三千人。俟八月到永昌。蠻暮木邦降後，其附近各土司再相機辦理。六月，趙宏榜帶兵五百名，抵鐵壁關。陳元震遣人至蠻暮。時土司瑞團赴阿瓦未歸，其母妻及弟坤商，以所屬五六十寨，三千餘戶請降。宏榜遂率二百人襲蠻暮之新街。一鼓克之。坤商率頭目於七月甲午赴永昌。途次為趙宏榜要至軍營。宏榜於關外撫止丹弄種六醋喇痛邦領蚌林暮習魯緬喇同草朶習董各山寨野人。八月乙卯，陳元震以憂鳩允冒投降頭目線蔑猛猛捧甕撒老安等男婦五人解報。陳廷獻報猛密土司亦欲乞降。遂關請永順鎮調集兵馬，欲領赴猛密。未行。而趙宏榜先於七月內赴新街。瑞團自緬甸回至速帕請降。猛密所屬之猛連壩

頭目線官猛赴新街軍營請降。趙宏榜又遣人招撫猛拱猛養。九月木邦降。先是木邦既屢遭兵而屬緬首立困相為頭目。又執木邦土司罕宋法之弟罕蟒立於阿瓦城以為質。復立者皆以監之者皆者。緬官名也。既而罕宋法殺困相等三十餘人。乞內附。會罕宋法即死時者皆尚在木邦。木邦夷眾請立其弟線甕團。緬首不允。又執其土舍法坤象。傳聞於內地。緬甯通判富森招之。然甕團亦未敢驟降。未幾其侄線五格為質於阿瓦。聞木邦變殺守者竄歸。甕團於是內附。富森并招撫緬甯以外犴狽。帶其長至永昌。俱加褒獎。時緬首已調遣賊眾數萬分道四出。一由蠻暮。一由猛密。猛育。一由木邦。一由滾弄江。於木邦之猛樟大視罕錫箔宋寨等處皆駐有重兵。我兵定議以禦之。是月總督楊應琚赴永昌受降。時陳大呂等以蠻暮之新街。距緬甸水陸之衝。自新街下速帕水路四五日可到緬甸。自猛密波龍陸路七八日可到緬甸。計日可望成功。趙宏榜兵前已在新街。新街在鐵壁關外。江干為互市之所。兵丁受暑者多。緬賊於八月中旬遣頭目覘軍營為乞降狀。趙宏榜不察犒而遣之時。新街兵少。各路警報時至。楊應琚乃飭永順鎮都司劉天佑。騰越都司馬拱垣。領兵四百餘。自翁冷出關。於九月庚午到新街。丁亥趙宏榜方祭蠹饗士卒。緬賊乘船猝

至帆檣啣接。倏忽蜂擁蟻屯者數千人。登岸攻柵。翌日賊勢益張。都司劉天佑死之。趙宏榜力戰相持者兩日。一夜官兵被困不能禦。趙宏榜收病傷各兵同軍械於草房內焚燒。乃與馬拱垣等潰圍間道。由野人寨退駐鐵壁關。瑞團至鐵壁關。趙宏榜安置於隴川。其族屬人民遁出關外野人村寨。時總督楊應琚方行次永平縣之太平鋪。聞警報即遣疾乃加調官兵分剿。十一月永北鎮朱崙進攻楞木不克。退守隴川。是時東路永順鎮烏爾登額帶兵至宛頂。欲進攻木邦。西路永北鎮朱崙帶兵駐鐵壁關。欲進攻蠻暮以復新街。雲南提督李時升於十一月甲戌自永昌起程。辛巳至鐵壁關。緬賊自新街至林岡固守。我兵四千餘人亦於楞木山頭分佈七營。壬午朱崙出鐵壁關。癸未至楞木。緬賊請於次日會戰。甲申卯刻賊約二萬眾喊叫前進。我兵營柵踞山之巔。向下施放鎗礮。殺賊甚眾。賊復緣箐盤繞。向上仰攻。我兵施放連環鎗礮。殺賊數千而不退。朱崙見賊勢猖獗。至丁亥相持者四日。請援甚急。提督李時升撥宛頂兵七百名赴援。是日我兵出柵下攻。賊佯敗。山腰礮火起。官兵受傷者二百餘人。戊子賊張象皮擋牌。自辰至午。方放連環鎗。擋牌忽撤。已立營柵一座。蓋逼近大營。李時升告急於楊應琚。不應。己丑官兵堅壁不出。庚寅賊詐為乞罷兵。

楊應琚乃以楞木之捷入告。是時賊甚衆。又限於林谷阻深。朱崙既不能克。復新街而緬賊先犯萬仭關。竟入蓋達矣。蔓延遂至戶腊撒。賊氛四熾。燒劫村寨。李時升又調楞木之兵二千名應援。萬仭關在騰越西。與神護巨石二關並列。時神護巨石。每關僅兵一百餘名。萬仭駐兵二百名。都司馬拱垣領之。馬拱垣以拏解奸犯。回至干崖。十一月己丑。緬賊約二千餘衆。由曼鳩遂犯萬仭關而入。時都司張世雄領兵四百名。駐蓋達。赴銅壁。謀與駐守之遊擊班第會攻賊。衆賊益近。至蓋達。焚掠土司城及太平街民居。壬辰。賊抵銅壁關下。班第等於翁冷立柵抵禦。賊衆仰攻。相持者竟日。賊旋縱火焚燒。官兵撤回關上。甲午。賊衆潛踰關。在山嶺架礮。於樹下擊火光。四起。官兵潰散。班第出關外。賊兵躡其後。死之。張世雄聞道回營。賊遂踞銅壁關。時李時升駐鐵壁關。聞警。臨沅鎮總兵劉德成領曲尋鎮兵七百。尋雲營兵二百。游擊清泰領撫標兵四百。游擊郝壯猷領督標兵八百。已於丙戌出曩宋關。至南甸。李時升遣游擊馬成龍守備馬雲沈洪等。帶兵九百名。由戶撒前攻。檄催總兵劉德成等從後夾擊。劉德成既擁兵干崖。遷延不進。馬成龍等復還回海巴江外。不能徑渡。李時升差把總田榮督戰。戊子。馬成龍等始渡江水沒腰。火藥皆濕。伏賊突起。冲殺游擊。

馬成龍陣亡。守備汪紀亦於壩尾陣亡。兵丁傷亡者眾。僅存未及渡江之七八十人。十二月丁酉。賊渡江至戶撒。李時升遣游擊邵應泌守備劉世雄等帶官兵一千二百名。前赴戶撒救援。賊連營扎駐於平原。壬寅。李時升遣副將陳廷蛟都司陳斌。抽撥楞木官兵六百名。甲辰。李時升又遣游擊劉國良都司張璋周印守備程轍等帶兵一千名。均赴戶撒山頭樹立營柵。賊眾來攻。我兵隨鎗砲拒敵。時劉德成尚駐干崖飲酒高會。擄婦女。縱兵淫虐。取富戶貲以為纏頭費。李時升連檄七次。劉德成擁兵不進。作跋扈語。總督楊應琚聞之。遣緬甯通判富森持令督戰。不從。則以軍法從事。劉不得已。始於乙巳日領兵抵盞達。賊既見戶撒兵漸加添。而又懼劉德成之擊。其後也是夜於營外添設號火。散放馬匹。仍作疑兵。賊已潛退。我兵不知。尚鎗砲竟夕。至曉踐入其柵。皆空壘也。始覺其遁。總督楊應琚遂以大捷奏聞。是時緬賊方議乞和。而兵復至。先是李時升以兵寡。故屢檄楞木兵。時朱崙遂以欲攻其外。先清其內為辭。決意撤兵。十二月己亥。緬目莽聶渺遮復至。參將哈國興營外願吃呪水乞罷兵。壬寅。朱崙放火燒寨撤兵。甲辰。退回鐵壁關。派兵一千五百名。駐鐵壁關外之板橙坡防守。癸卯。偵報者稱有賊至。酉刻。即放火焚燒糧石。火藥聲振山谷。乘夜

倉皇疾走。村寨四處皆火起。鎗砲之聲不絕於耳。黎明始退抵隴川。而楞木之衆。又由南庫弄河板橙坡犯鐵壁關矣。於是提督李時升。總兵朱崙。退至杉木籠山。而由戶撒退回之賊衆。尚盤踞銅壁關下。十二月壬子。劉德成抵翁冷。賊設伏誘戰。德成扎營。堅壁不動。癸丑。刻賊乘月落霧起。統眾來攻。官兵放連環鎗。賊不能進。殺賊衆三百餘人。賊退至銅壁。甲寅。出關而遁。乙卯。劉德成遣守備黃化等領兵進剿。聞賊遁。乃令黃化領兵六百名駐銅壁關。各關俱添兵防守。總督楊應琚自途次遣疾漸若失心。巡撫湯聘以聞。上命兩廣總督楊廷璋來滇。比廷璋至。而楊應琚之疾漸愈。時楊應琚方以捷聞。且恃前和議。謂已受降藏事。楊廷璋遂返粵。前此上遣侍衛傅靈安來視疾。傅靈安。大學士忠勇公傅恒子也。往還數四。奉旨即以總兵補用。是時賊犯鐵壁關。入隴川。乞降。總督楊應琚許之。復犯猛卯。戶撒之東四十餘里。為隴川。總兵朱崙既退。駐隴川。提督李時升恐緬賊之橫截我軍於外也。乃退至杉木籠山。緬賊之由庫弄河板橙坡犯鐵壁關入也。李時升調游擊邵應泌。戶撒之兵二百名。檄催朱崙領兵三千名。前赴鐵壁堵剿。並令劉德成飭副將陳廷蛟帶兵一千名。赴弄貴要截賊歸路。朱崙邵應泌等既不遵調遣。俱回杉木籠山。劉德

成復執守關之議于翁冷頓兵不進。賊眾四千餘人。遂至弄貫。連營樹柵。分兵四出。焚掠村寨。擄掠我弁兵者十餘人。旋據隴川。劄營緬寺。隴川河外亦結營六七座。乙卯。朱崙領兵至隴川。次日午刻。賊以馬騎挑戰。我兵分翼襲之。越二日。李時升遣游擊豆福魁領兵七百名來會。朱崙派兵設伏。定議進攻。戊午卯刻前進。賊分兵三路迎拒。我兵奮勇攻敵。伏兵分路拒殺。賊敗。我兵圍之。庚申午刻。賊騎自弄貫來援。突於叢林中出。官兵驚潰。賊營亦乘機鼓噪而出。追逐數里。時領兵叅將哈國興游擊毛大經劉國樑豆福魁都司張璋周印守備孫夢貴魏嶸程轍等俱不聽總統朱崙之令。悉撤回營。軍械鎗礮遺失者多。總督楊應琚仍以克捷奏。聞是時李時升分檄臨元鎮劉德成由戶腊撤出隴川。永順鎮烏爾登額由戶思朗出隴川。三面會攻。不果行。總督楊應琚遣副將孫爾桂赴朱崙軍營。鎮沅府龔士模革職。開化同知陳元震從之。傳令剿撫。相機速辦。蓋陰示以和了局也。辛酉。至朱崙軍營。是日。緬目莽聶渺遮在隴川河。於都司張璋營外乞和。癸亥。求見哈國興。賊目至隴川河西。哈國興出營。在隴川河東。各遣通事一人。於河中土墩傳說。逾一二時。賊獻哆囉呢四疋。醃魚三擔。哈國興犒以綉緞銀兩。賊定時日撤兵回巢。總兵朱崙報之。總督楊應琚

遂以緬酋孟毒之四胞弟卜坑領兵土目莽轟渺遮詣軍營乞降。懇賞給纓暮新街。以為貿易資生之路入。告。是日賊還我弁兵八人。撤至弄貫。遷延未去。提督李時升。檄飭總兵朱崙偵探賊信。賊已以其資重運送鐵壁關。赴新街下船。朱崙不識兵機。復遣精騎追之。賊以為敗盟也。於除夕日。由邦中山復犯猛卯。三十二年正月丁卯。賊既據猛卯城。時提督李時升。駐杉木籠山。總兵朱崙。副將孫爾桂。移兵弄貫。戊辰。李時升遣副將哈國興。游擊劉國樑。都司田萬鎮。周印。守備溫廷秀。魏嶸。程轍等。領兵一千二百名。副將孫爾桂。游擊毛大經等。領兵一千名。土練三百名。俱赴猛卯。賊眾已赴底麻渡紮筏。城虛無人。哈國興孫爾桂。遂率兵練二千人。入猛卯城居之。賊眾將濟。聞我兵至。決以為敗盟。悉反攻城下。我兵旋復堵塞。施放鎗砲。賊攀城而上者。用沸湯注之。雜擊以石塊。哈國興登城督戰。鎗傷左腮。穿落牙齒者十一。把總朱才進。受鎗破腦而死。賊遂連營城下。圍困我官兵者七日。哈國興遣兵丁。覓間道。至李時升隴川軍營請援。李時升先已調劉德成領兵一千四百名。將至隴川。令烏爾登額領兵二千名。由宛頂渡速養江。以擊賊。後時賊兵盤踞。分佈要隘。乃遣素克全泰領兵八百名。由虎踞一帶小路前進。陳廷蛟領兵二千餘名。由邦中山前進。烏

爾登額先已至速養渡沿江邀截賊往禦之戰於對岸聞我援兵既至復回迎敵丙子巳刻我兵至猛卯山脚遇賊戰勝之至城下土練三百名先縋城出乘勢掩襲賊兵潰散是夜官兵宿城外遣人援梯通信丁丑城始開官兵會合追剿賊兵迎敵次日追至底麻江邊悉力拒敵游擊毛大經都司徐斌守備高乾陷於泥濘被賊鏢鎗陣亡賊遂浮江而遁入木邦總督楊應琚提督李時升以猛卯邊外匪眾七八千人欲至木邦滋擾官兵攻殺賊已敗遁現在追剿以聞是月辛卯總督楊應琚以猛卯賊退境內已甯將議止而前所奏將蠻暮新街賞給貿易經上察其偽屢奉

嚴旨責其粉飾欺罔乃遣總兵朱崙烏爾登額楚雄游擊莫瀆邵應泌等領兵八千人沙練波龍廠練一千人前進木邦朱崙二月丁酉自弄貫起營途次遷延越二十四日辛酉始至木邦時賊據木邦者萬餘是日午刻即與我兵迎敵孫爾桂持令督戰殺賊甚眾賊退據江留營九座是日木邦所轄村寨俱被賊焚擄夷民逃竄軍糧均藉內地輓輸委游擊袁夢麟李文廣領兵八百名分佈各台護送糧運袁夢麟等均於內地之分星塔三台山弄伍分駐外域只景陽兵一百名暮董底麻兵各五十名其孟撒蠻黑南庫弄三處並無兵練運糧撥僱牛馬四千餘匹委糧員威遠同知

張遐齡効力知州徐名道隨營供支賊衆截阻糧道三月丁卯至南庫弄辛未日至蠻黑劫掠牛馬糧石殺死馬夫壬申總兵朱崙奉旨逮問官兵以孫爾桂烏爾登額統領之三月哈國興退自新街先是新街賊衆已退李時升抵銅壁關進抵野牛壩李時升奉旨提問哈國興率趙宏榜參將四十一游擊郝壯猷雅爾姜阿吳大士等領兵三千餘名前進庚午抵蠻暮賊衆百餘人遁去甲戌抵新街並無一賊總督楊應琚復據哈國興稟報以克復新街奏聞是時炎瘴已熾官兵染病者相繼哈國興稟請撤兵總督楊應琚遣迤西道陳作梅永昌府陳大呂赴新街會勘確情哈國興遂自新街撤兵駐杉木籠山是月癸巳雲南提督楊甯至木邦軍營楊甯素以勇敢著任廣東將軍時奉命速赴任至是抵營攻賊奪獲舊寨嗣相持者久而孟艮之賊已犯孟連矣賊知我師糧絕於四月戊戌數接戰賊情狡詐出沒無定壬寅至篆金塔劫運糧牛馬殺傷官兵沿途阻隔糧運不繼己酉又至蠻暮賊擁衆攻擊甚急我兵已七日無糧不能支提督楊甯下令撤兵兵即潰游擊莫澹俊德死之楊甯遂於是日至蠻暮壬戌入黑山門時烏爾登額已被効即逮入都入孟連之賊於三月癸酉自木邦入境孟連土練及犛犛之練不能抵禦賊據孟連燒劫募迺廠

應襲土司避居景杏。乙酉賊破賊連之黑河。丙戌至上猛尹猛撥練於辣蒜江禦之。不克。賊至猛猛入耿馬孟定。四出焚劫。夷民倉猝不知賊至。尚貿易於街場。力作於田畝。均被擄掠。是時順寧府城兵甚單。木邦之賊未退。總督楊應琚調發木邦官兵。由滾弄江前赴攻剿。不能即至。順雲營叅將蘇國富領兵亦在滾弄江許。緬甯居民震恐。撥練於那椒河大蚌江打雀山各安隘防守。凡盤踞二十餘日。賊始由滾弄江兩路而去。是月。緬賊復據整賣景線孟良。先是三十一年七月。總督楊奏請將整欠兵六百名。猛撒江兵二百名撤回。九月。又請將猛良整欠兵全撤。留楚姚鎮華封協同普洱鎮甯珠駐守。緬賊忿整賣六本景線孟良整欠之背己也。謀以報之。遂據整賣六本。蔓延至景線。逼孟良。又由老本趨整欠。十二月。六本土司召猛齋。聞緬賊欲至六本。徵調景線景海土練。景線集練九百。景海集練四百。從之。而緬賊先以破六本。景海土守備召罕彪同回景線防守。三十二年正月。緬賊至景海。召罕彪等領練迎戰。不克。退回景線。甲午。緬賊至景線。景線宣撫司叻賽同召罕彪等合力攻戰。四日不克。叻賽召罕彪奔孟良。孟良指揮使召丙亦挈族遠徙。是時楚姚鎮華封駐劉普洱。乃與普洱鎮甯珠同遣駐防打樂猛混之游擊司邦直守備潘鴻臣帶兵九

百名進守孟艮。游擊權恕帶兵二百名赴打樂策應。時止把總韓榮外委趙喜馬伯貴三員帶兵二百名駐打樂。司邦直等均在猛混觀望未進。而緬賊已據孟艮。前趨打樂老本一路之賊衆亦至猛勇。猛壘弁治進前往迎之。被賊圍困受害。賊遂犯猛壘。欲入猛籠。整欠頭目召教之子召淵。斂銀賂賊謀結內犯。諸猛震恐。二月辛酉。緬賊至打樂。時把總韓榮外委卜發等及兵二百餘名住打樂。聞警。韓榮即派卜發領兵三十名往三島坐路堵禦。賊猝至。韓榮及兵衆皆戰死。生還者三四人。游擊司邦直遣潘鴻臣領兵二百往援。途遇受傷兵。知打樂已陷。引軍回。邦直鴻臣及游擊權恕俱遁回九龍江。駐劄緬賊遂入猛混。猛籠時華封已出九龍江。遣都司甘其卓赴整控堵禦。猛籠之賊欲赴整欠。先捧乞救甚急。賊遂渡整欠江。逼近猛翁。華封自九龍江前往補角。遣司邦直駐小渡口。權恕至檄攬壩以禦之。緬賊之由孟艮竄入打樂也。司邦直等遽行退避。轉以接陣殺賊。控報時總督楊應琚之次子重英以江蘇按察司來滇。有仿古監軍之名。乃會同雲南巡撫湯聘。劾奏守備潘鴻臣先瘴故總兵華封。寧珠游擊司邦直。權恕。都司甘其卓。俱拏問。邦直恕其卓俱正法。是月革大學士總督楊應琚職。逮入都。以承恩公明瑞代。四月巡撫鄂寧至普洱。湯聘赴貴

州鄂甯即劾楊重英驕縱去監軍號以道府銜從征巡撫鄂甯旋以瘴氣大作普洱無可辦事應回省具奏得旨嘉獎令赴永昌會辦進剿五月總督明瑞至省即赴永昌巡撫鄂甯亦偕往明瑞以將軍兼制府給滿洲兵三千調川貴及滇省兵二萬餘以副都統額爾景額為叅贊給關防調河南開歸道諾穆親為滇鹽道陝西漢中道錢受毅為滇迤東道及軍機司官傅顯馮光熊襄軍事議大舉剿賊明瑞至則首發楊應琚欺罔之罪疏略言緬甸土人呼為老緬或呼為莽子蓋指前酋之姓木匪乃今首原為木梳長是一非二至木邦等土司種類繁多楊應琚以莽已絕滅引為己功誤木緬另為一事新街亦民夷交易之所原無廬舍其荒唐妄誕之處不可勝數以致調撥毫無意見一聞議降旋即撤兵動失機宜滇兵積久廢弛無鬥志將領亦未諳陣戰遺失礮位軍械無算復奏劾李時升朱崙劉德成及烏爾登額趙宏榜罪皆報可李時升朱崙劉德成皆伏法烏爾登額趙宏榜下獄六月解前總督楊應琚至避暑山莊命廷臣鞫得實上大怒暴其罪於天下令自裁是時楊應琚長子前永昌府知府重毅解湖北任奉旨省親至滇因索玩器於瘴故前騰越州知州陳廷獻之家人杖殺之論抵是月逮貴州巡撫湯聘是月總督明瑞條上大

舉機宜略曰。前次辦理種種草率。動失機宜。如永昌騰越順甯威遠普洱。沿邊土境二千餘里。迤西七關八隘。旁通側出。絕少險要可守之區。若處處駐兵二三萬。衆亦不敷分派。今臣親督勁兵。鼓勇進剿。賊必救護巢穴。其各土境扼要總區。如九龍隴川黑山門等處。自應留營。派委妥員。慎選兵練偵探賊警。隨時剿逐。知會就近土司應援。其餘崎嶇小路。祇令各總兵驅將弁。使人長川游巡備禦。如此則防守之兵大減於前。而聲勢不分。較為得力。先於新街水路上游。量為伐木造船。使船料木片沿江流下。先聲牽綴。彼知將長驅水道。必於此設備。以分其勢力。兵自永昌騰越兩處田口。由宛頂木邦一路作為正兵。其餘或分兩路三路。由猛密等處並進。俾得聯絡聲援。出奇設疑。使賊疲於奔救。前所需兵糧。係雇覓夫馬。設站滾運。撥兵護送。此次進剿。不若裹帶為便。細核購辦牛隻馱載。所費且有節省。官兵出口後。自黑山門遮放以內。仍照例安設台站。備遞文報。至軍前遇有奏報。即於進剿官兵內。擇妥幹馬壯者數十員名。長川送至黑山門交遞。如經過外夷部落。有誠心歸化者。酌留官兵數十或二三百名。作一大台站。以資遞送。倘得依此相機酌辦。更屬周妥。遞事亦較便易。并條列軍械糧運馱載各款。俱報可。是月。又查辦遮放運糧官員。奏速同

知胡邦佑守備陳護下獄尋釋。令隨營贖罪。考訂輿圖中地名。七月。劾曲尋鎮總兵索柱以其稱疾偷安也。得旨落職。効力自贖。是月。以提督楊甯辦軍務多舛。奏請以貴州提督譚五格調補。楊甯尋亦革職。是月。復劾永昌府知府陳大呂。以其勒買軍糧。縱衙役短價也。是月。補罕朝璣為把總。罕朝璣者。耿馬土司罕國楷之從子也。先是二十八年。土司罕國楷稟其子不孝。及通謀周國惠。審訊無實。留會城。以隨征功授土把總。茲復以去歲有功。且通夷漢語。授把總。是月。復查糧員逃入者。以提督李時升呈出書稿內。有糧員吳等紛散去語也。革典史夏之璜職。其吳楷張志元胡紹周陳正楷等。皆以原無派撥。護糧官兵得宥。福靈安卒於永昌。七月。整欠召教。率緬賊陷猛彝。追以先捧。遂犯猛腊。至九龍江。先是緬賊由打樂入者。據猛遮之猛混未散。由猛勇入者。據猛籠劄營盤踞。德保已授普洱鎮。同開化鎮書敏於四月丙午。先至九龍江軍營。調到官兵四千二百名。正值烟瘴熾發。欽奉諭旨。軫念士卒。乃令停兵。蓄精養銳。將領分遣弁兵。於補角小猛崙檄攬壩茨通。駐劄防守。猛勇之召工既附。緬賊整欠之召教召淵。惡以先捧之授指揮使。而並得管轄其整欠也。務謀執以先捧以洩其忿。六月癸巳。召工召教召淵。率賊眾二三千人。至猛彝。以先捧與

之力戰經旬。景線、訥賽、景海召罕彪集練助之。奈軍糧匱竭，火藥鉛彈俱無。夷民困餓難支。丙午，猛翁遂隘，以先捧遁入茶山之漫了寨。訥賽召罕彪等竄入內地。是時開化鎮書敏駐小猛崙，普洱鎮德保駐九龍江之大渡口。召工等追攝，以先捧遂入猛腊。七月辛卯，緬賊三百餘人及附從之猛勇，整欠孟艮獯夷約千人，貴家餘黨二百餘人，至小猛崙。書敏隔江施放鎗礮。日既午，書敏病篤，遂回緬寺，留官兵堵禦。至晚，緬賊從上游而渡，官兵冲散。書敏奔茨通之小寨，令都司那蘇泰帶兵二百名堵禦。蠻賴閏七月乙未，賊由茨通至蠻賴，那蘇泰死之。書敏由倚邦至舊埕，病故。德保在九龍江聞風逃遁，率四達色等徒，跌歷九晝夜，回至思茅。住二日，率將官等復赴九龍江，緬賊三百餘人至檄攬壩，小猛養焚燒擄掠，由整哈渡而退。至孟艮盤踞。普洱知府及參將報知總督明瑞，即參奏德保解京正法。書敏戮屍梟示，乃飭署普洱鎮七十一昭通鎮佟國英率兵分駐小猛養補角。凡外域投誠之難民，寄居各猛者俱行賑卹。九月，將軍兼總督明瑞議進剿，時領隊大臣內廷侍衛率滿洲官兵、川貴鎮協、率川貴將領弁兵及本省派出之官兵俱抵永昌。四川、廣東、廣西解運之牛馬、滇省各府州縣所辦之糧馬亦陸續到齊，乃定議分為兩路。將軍明瑞率大兵由

木邦進取錫箔。參贊額爾景額由老官屯進取猛密。時從征者員外郎富顯馮光熊道員諾穆親錢受穀。道府楊重英郭鵬冲蕭日章。革職知府陳元震胡邦佑。同知圖敏提督譚五格。鎮將得寶李全國柱達興阿王玉廷哈國興本進忠長青。及文武員弁。以李經朝翁得勝等為通事。充嚮導。線甕團線官猛線五格等俱在軍。二路約相會於阿瓦。乙巳出師。會天大雨。三晝夜不絕。人馬俱立泥潦中。饑且冷。多疾病。糗糧又盡。濕裹糧以牛。行不能速。至潞江。人衆船少。不能畢濟。十月壬戌。始渡船至營分。兵將軍明瑞以庚午師次宛頂。越八日。整隊入木邦。軍容甚盛。時參贊珠魯訥以十日至騰越。進木邦即留守。給以兵五千。俾為聲援。以楊重英郭鵬冲及陳元震胡邦佑。司印務糧餉。十二月。參贊額爾景額卒於老官屯軍中。時景額亦於十月癸卯抵騰越。與提督譚五格率官兵。於十一月壬辰出虎踞關。趨猛密。越六日至老官屯。賊已立木柵。進攻不能克。日與接戰。亦不能勝。我兵久屯於堅柵之下。人亦多疾病。額爾景額幽恚以死。上優敘之。以其弟額爾登額代。是月。將軍明瑞率萬二千人抵錫箔。江結浮橋以渡。至蒲卡。始遇賊之前哨。擒數人。詢知賊聚於蠻結。遂進攻蠻結。賊果立十六柵以待。領隊大臣觀音保。麾衆先據山之左臂。賊來爭不得上。翌日。兩

軍相持未決。而顧賊柵甚堅。其法立木為柵。聚兵於其中。柵之外又開深壕。植竹木於旁。皆銳其末而外向。賊有柵自護。我鎗礮不能傷。而賊從柵隙處發鳥鎗擊我輒中。此賊之長技也。哈國興請分三路登山俯趨而薄之。軍士皆奮。時出邊已逾月。未見賊。至是始與賊遇。無人不欲殺賊也。一呼而直逼其柵。有黔兵王連者。先躍入。十餘人繼之。賊恇亂不知所為。多被殺。遂破一柵。乘勢復攻得其三。而十二柵之賊。乘夜盡遁。蓋賊自新街交兵以來。從未經此大創。已首竄喙伏。不敢復抗矣。明將軍亦一目中傷幾殞。越數日。始稍愈。領隊大臣觀音保札爾豐阿等。咸勸乘勝退兵。至木邦。整旅復進。明將軍負銳氣。欲直抵阿瓦。觀音保曰。我兵出師時。已失軍裝。今軍器日見其少。糧餉不足。恐難深入。以受其紿。明忿然曰。汝氣餒否。非夫也。觀音保傲然曰。若非滿洲丈夫。吾儕共將軍死可也。因進軍象孔。去阿瓦祇七十里。失道而軍中糧已匱。明將軍集諸將議。諸將懲前言。莫敢有言退者。明瑞念糧既斷。勢不能復進。而又慮猛密路之師。或已先入。而將軍轉退兵。則法當死。聞猛密有糧。且地近猛密。冀可得猛密路消息。於是定計就糧。猛密賊探知我兵不復向阿瓦。又我病兵為賊所掠者。詢知軍中糧盡。糾眾來追。及我於章子壩。至是無日不戰。明瑞與哈國興觀

音保等更番殿後。至猛籠果多糧。軍士賴以濟。會歲暮。即其地度歲。共駐兵七日。以行。而猛密之信杳如也。是月。參贊額爾登額。以九千眾攻老官屯木柵。不克。師久頓。賊眾日增。王玉廷陣亡。時錫箔路音信已斷。得旨。令前赴應援。乃與提督譚五格。撤兵回。時倉卒撤兵。又不設殿。賊得以襲我之後。軍器亦失。乃入關。賊即尾隨。入戶。撒拉撒二處。恣搶掠。時副將孫爾桂。王振元。俱由關退回駐劄。賊聞有備。乃退。額爾登額偵猛卯及邦中山。梁有賊。不敢進。乃旋師至隴川所屬之猛籠。迂途月餘。由龍陵出宛頂。三十三年春。明瑞自猛籠取道大山土司以歸。猛籠糧尚多。而牛馬俱盡。無可馱運。人各攜數升。餘皆火之。將至大山。又有蠻化之捷。先是賊之綴我也。每夕駐營。猶相距十餘里。不敢近。至是我兵營於蠻化山巔。賊即營於山半。明瑞浩然曰。賊輕我甚矣。若不決一死戰。益將肆毒於我。無噍類矣。賊久識我軍號令。每晨興。我三吹螺而啟行。賊亦起而追我。明日仍吹螺者三。而我兵盡伏於箐中。以待。毋得有一人留營者。令既下。翌日三螺畢。賊果謂我兵已行也。爭蟻附而上。我兵萬眾突出。鎗礮聲如雷。賊惶遽不及戰。輒反走。趾及頂背。自相蹴踏。死者無慮二千餘人。我兵乘勢擊殺。又一二千人。坡澗皆滿。是役我兵傷者數人。總兵李全受傷死。自是賊不

敢近。數日。每夜在數十里外轟大礮數聲而已。而賊之先一日過者。已柵於要路。明瑞留五日。以所得牛馬分犒軍士畢。行至其處。則已攻不能拔。有波龍人引以間道。始得出。過波龍老厰。新厰是貴家所採銀處。居民遺址盡數十里。計當日厰丁不下數萬。已皆為賊衝散盡。愀然者久之。而賊復增兵追至。是月木邦兵潰。上年十二月。珠魯訥駐師木邦。分撥參將王棟赴錫箔擺台站。索柱赴宋賽擺台站。守備郭景霄於天生橋擺台站。丁丑皆起程。甲申。索柱偵得有賊兵至。語即前進。遇賊戰路阻。丙戌退守錫箔橋。正月辛卯。賊數百來攻。次日賊數千至。以大礮攻。守備郭景霄方渡河。接索柱營。見賊四面來攻。即潰。參將王棟營兵亦潰。索柱等衝出。次日。總兵胡大猷之師復潰於葫蘆口。索柱陣亡。辛丑。賊鋒及木邦。參贊珠魯訥誓死。率文武七十人出禦。乃付印及御賜將軍之寶匣於陳元震。言我死汝以是歸。元震懼。即偕郭鵬冲逃入內地。珠魯訥出師。隔河遇賊。歸而欲以印徵兵。而元震已齎印遁。因移知巡撫鄂甯。鄂甯即參奏。得旨以叛論。置極典。明日壬寅。賊大至。珠魯訥自剄。執楊重英。我兵大潰。總兵胡大猷與胡邦佑咸陣歿。廣南府經歷許景淹亦自剄死。木邦一路台站俱斷。其賊首乘勝率猛密木邦二路之衆。畢集於明將軍壘。明瑞行抵小

猛育賊已蝟集不下四五萬人。我兵當分七營。而環視四圍。皆賊也。而額爾登額尚駐兵宛頂。去小猛育僅一舍。竟擁兵不救。明瑞遣卒探路。曰：路旁已有賊柵矣。乃命諸將達興、阿本、進忠等率軍士乘夜出。而身自拒賊。相從者領隊大臣、觀音保、扎拉豐阿、總兵哈國興、常青、德福及巴圖魯侍衛數十人。親兵數百人。及晨血戰於萬賊中。無不一當百。已而扎爾豐阿中鎗死。巴圖魯侍衛皆散。副都統德森保竟降賊。觀音保發數矢。連殪數賊。尚餘一矢。欲復射。忽收而策馬向草深處。以其鏃刺喉死。恐矢盡無以自戕而被執也。明瑞身負數傷。亦慮落賊手。力疾行。距戰處已二十里。氣僅屬。乃從容下馬。手自割髮。授家人使歸報。而自縊於樹下。家人以木葉掩其軀而去。二月之十日也。計自章子壩與賊接戰。賊日增。我兵日少。孤軍無援。轉戰五六十日。未嘗一敗。明瑞晨起即躬自督戰。且戰且撤。及歸營。率以昏時。勺水猶未入口。糧久絕。僅啖牛炙一爨。猶與親隨之戰士共之。所將皆飢疲創殘之餘。明瑞體恤備至。有傷病者。令士練昇以行。不忍棄。故雖極困憊。無一人有怨志。及其死也。非不能自拔出。蓋以阿瓦未平。懼無以返命。上亦有全師速出之旨。而路阻不得達。遙望闕庭。進退維谷。故傍皇展轉。決計以身殉。又不忍將士之相隨死也。結隊徐行。持重

自固使賊不能覆我。直至小猛育。去宛頂不過二百里。計將士皆可到。然後遣之出。而自以身死賊中。嗚呼。此意良可悲矣。方軍勢日蹙時。鬥愈力。嘗謂諸將曰。賊已知我力竭。然必決死戰者。正欲賊知我國家威令嚴明。將士用命。雖窮蹙至此。無一人不盡力。則賊知所畏。而後來者易於接辦。此其謀國之深猷。尤非徒慷慨赴死者所可同日語矣。癸酉。兵將至宛頂者已多時。巡撫鄂尚未知將軍陣亡的耗。即將額爾登額譚五格。逗遛不進。失悞軍機。及得將軍聲息。並不通知內地實屬有心貽悞。具劾奉旨俱逮問。越數日。得將軍凶問。上聞。上震悼。賜卹立祠。後於四月中。命侍衛兵弁及將軍明瑞之家人數人。赴猛育尋收將軍遺骸歸葬京師。額爾登額解赴京。上親訊額尚以無糧對。上愈怒。廷訊時。譚五格自稱老臣。上命侍衛撻至數百。額爾登額論磔刑。明瑞喪到日。上親奠於郊。即用額爾登額以享之。譚五格亦正法。是月。命協辦大學士阿里袞來滇。協辦軍務。即授為參贊。以鄂甯為總督。調江蘇巡撫明德為雲南巡撫。三十三年二月丁亥。授大學士忠勇公傅恒為總略。阿里袞阿桂為副將軍。舒赫德為參贊。傅恒俟將次進兵。再行前往。阿里袞已赴滇。舒赫德即馳驛遄行。是月派荊洲滿洲兵一千五百名。成都滿洲兵一千五百名。

赴雲南。以荊洲將軍永瑞統之。是月。派京兵來滇。時以進剿。於去歲三千兵之外。復派健銳營兵一千。火器營兵二千。前鋒護軍二千。令將校率領陸續來滇。其前鋒護軍二千。旋停止。是月。以五福為雲南提督。是月。副將軍阿里袞抵雲南。時幕府為郎中明善員外郎薩靈阿。三月。叅贊刑部尚書舒赫德抵永昌。會同總督鄂甯。密奏籌辦情形。略以每兵千名。應需馬三千九百。非馬十萬。不足濟用。又稱現已設法招致緬匪投誠。疏上。得 嚴旨。發原摺。命廷臣徧閱。飭其乖謬。可鄙可笑之處。下部議革尚書職。得 旨。給副都統銜。前赴烏什。令總督鄂甯復奏。是月。戊戌。猛勇召功率其弟召糯腊。及緬賊目布足。撻喇。帶緬子三百人。猛勇整欠。猺夷三百人。由猛勇猛籠。遂至九龍江外。越二日。昭通鎮佟國英。護普洱鎮七十一。率兵於蠻紅接戰。破擊佟國英手掌官兵。舊勇陣亡者數十人。賊眾退至猛混。乙巳。緬賊節蓋。率緬子一百餘人。孟艮召散。率猺夷四百餘人。由大猛養進。猛遮土弁刀召鈴。伏弩截殺。次日亦退至猛混。與召坎等會合。己酉。出打樂隘。退歸孟艮。尋奉 旨。荊州成都兵俱赴普洱。是月。副將軍阿里袞等。請調隣近各省道府來滇。辦理軍務。派出道三員。知府六員。其丞倅州縣佐雜。每省各派四五員。晦日。都司哈廷標。於宛頂遇大山土司之從

子阿籠云二月間隨伊季父於猛烈地方謁見將軍明後於猛育衝殺相失副將軍
阿里哀總督鄂甯奏准暫為養贍俟進兵時往勘情形酌辦四月撤隨將軍明瑞進
剿之兵回京其老官屯一路之兵仍留滇是月緬酋差我兵之被俘者許爾功等八
人具蒲葉緬文求和并齋楊重英稟一封稱緬王不殺屢有投誠之意且緬國各頭
目俱愿投誠是以苟延至今同客長李萬全尹士玠等宣諭我國德威極力招撫仍
照舊例辦理與守備程輟盧懷亮馬子健王承瑞等同具副將軍阿里哀以聞不許
五月總督鄂甯復奏云舒赫德稱廷論復剿緬匪一事急切不能前驅埽穴賊匪
投誠即遣人探去亦未為不可實因冒昧誤稱設法招致得旨二人所見乖謬彼
此原屬相等下部議革總督鄂甯職奉旨鄂甯降補福建巡撫以阿桂代時阿桂
在伊犁總督印務以阿里哀署行宥烏爾登額甯珠華封趙宏榜罪令在軍營効力
趙宏榜行次河南襄城縣中痰至七月卒是月巡撫明德赴永昌是月以滇兵惟怯
積懦撥貴州兵五千名來滇撥補是月木邦首苗温差人至猛古地方之蠻遮寨頭
人金猛處令送字與遮放土司懇內地八土司代乞求和并偵探從前八人具書求
和之信其緬文內有天朝四位大臣來滇可否准和之語副將軍阿里哀據奏七

月奉旨。普洱今歲不必進兵。駐劄普洱將軍永瑞等。加意防守。是月嚴奸民販貨出緬之禁。汰滇冗兵。議改曲潯楚姚永北三鎮為副將。改定營制。於大兵事竣後行。總督阿里袞。巡撫明德。修省城至永昌一路。傾頽道路。八月。調四川馬五千八百。駝載馬騾二千。九月。總督副將軍阿桂抵滇時。幕府為革職郎中王昶。中書趙文哲。十月。副將軍阿里袞。駐兵於騰越。遣侍衛達里善至南坎。殺二百餘人。海蘭察至頓拐。亦殺二百餘人。襲蔓鳩前鋒。抵江邊。焚其寨柵。又殺賊六七百名。以馬力不足。未渡江而還。具奏。巡撫明德以經理馬匹不善。得嚴旨。十二月。廣東廣西營馬。及購買馬共一萬。於下旬陸續起程。期於明歲春間抵滇。奉旨查訊。本年二月。烏拉撒地方被兵一事。前巡撫鄂甯。何以奏報並無一賊。副將軍阿里袞等奏稱。房屋未經焚毀。搶去四百餘人及牛馬。尋落巡撫鄂甯職。給侍衛銜。軍營効力。是月。派索倫兵二千名來滇。明年春。復派一千。吉林兵一千。盛京新滿洲西燹兵一千。三十四年正月。奉旨。令臺灣總兵葉相德。選福建水師兵二千赴滇。戊申。阿里袞阿桂俱授為副將軍。其總督以明德補授。巡撫以喀甯阿補授。二月庚午。大學士忠勇公經略傅恒。自京起程。是月。復派厄魯特兵一千餘名。三月。命伊犁將軍伊勒圖來滇。提督五

福將軍永瑞率兵巡邊。行次打樂。遇賊。剽殺出境。是月。經略抵滇。即馳赴永昌。先是滇省頒布謁見經略儀注。自平夷至永昌。修館舍。戒僕夫以待。時從行之幕府。為侍讀學士毓奇。侍讀孫士毅。給事中劉秉恬。郎中博卿。額。主事惠齡。是役也。前後徵調本省兵一萬六千名。四川兵七千名。有奇。貴州兵四千三百名。滿漢兵共三萬有奇。議以九月二十日以前抵永昌。以待進取。是月。降雲南總督明德為江蘇巡撫。以彰寶為總督。經略奏留暫辦總督事。尋以阿思哈為總督。復奉旨。令阿思哈於新街扼要之地駐守。以彰寶為雲南巡撫。調喀甯阿為河南巡撫。俟彰寶到任。再赴新任。是月。令護軍統領伍三泰。副都御史富顯等。赴野牛壩。時船料釘鐵已備。至秋。初。船造成。而富伍俱以瘴卒。五月。續派京兵一千名。即先派前鋒護軍之半也。六月。奉旨。阿思哈到滇後。其巡撫印務。原著明德署理。阿思哈帶兵前進後。總督印務。亦着明德署理。七月。降荊州將軍永瑞。雲南提督五福。為三等侍衛。尋革職。以開化鎮調駐思茅之兵丁張國甯。因姦被殺。約束不嚴也。以本進忠為提督。旋卒。以長青代。經略既至永昌。越八日。兩阿將軍及伊犁將軍伊勒圖。偕至南徼地。多瘴。羣議宜俟霜降後出師。經略遲之。謂若是須坐守四五月。既糜餉。且軍初至。當及鋒而用。久則先

懈。非計也。其進兵之路。以阿瓦城在大金江之西。若從錫箔。則阿瓦仍隔江外。惟騰越州西。曼鳩江即大金江之上流。過江則為猛拱。猛養兩土司。前明王驥征麓川。追思機發到此。刻石江邊。所謂石爛江枯爾。乃得渡者也。由猛拱。猛養。可搗其木梳之老巢。由木梳至阿瓦。又皆陸行。步騎可直抵城下。乃定議。大兵渡曼鳩而西。其偏師先議在普洱。為聲勢。後改議從猛密。夾江而下。造舟於蠻暮。以通往來。部署既定。七月二十日。經略大兵起行。阿里哀時病瘍。不能行。經略請留養疾。阿里哀誓從征。乃留阿桂於蠻暮。督造戰船。經略至曼鳩。集舟結筏。凡十日。乃畢。師次猛拱。土司官渾覺先遁。繫其小妻。招之乃來降。獻馴象四。貝葉書一。牛百頭。糧數百石。至猛養。亦有牛米之獻。於是所歷二千餘里。皆不血刃而下。惟途間忽雨。忽晴。山高泥滑。一馬倒。則所負糧帳盡失。軍士或枵腹露宿於上。淋下濕之中。以致多疾病。猛拱。猛養。雖緬屬。非緬腹地。故緬酋不遣兵來。而緬俗以八月前刈禾。至中秋則集兵出。九月下旬。阿桂造百船成。所調閩粵習流之士亦至。將由蠻暮江出大金江。賊已列船扼江口。阿桂擊敗之。賊目賓雅得諾被創死。由是江路無阻。伊勒圖往迎。經略過於哈坎。經略以十月朔渡江。回蠻暮。是役也。奔走數千里。疲乏軍力。而初無遇一賊。經略之聲

名遂損。因羞恚得病。賊輕我兵。遂以大衆水陸來犯。阿桂將步兵。哈國興將水兵。陸路之賊先沸脣至。旌旗蔽野。勢張甚。阿桂麾兵以烏鎗連環進。弓矢繼之。騎兵又從旁蹂之。賊不支。遂大潰。我兵追殺無算。哈國興率舟師順流下。賊猶列艦以拒。有閩兵躍入賊船。一賊囚水遁。閩兵即入水斬之。賊奪氣。我兵驩而奮。因風水之勢。蹴之。賊船自相撞擊。多覆。凡殺溺死者數千。江水為之赤。江之西亦有賊結柵自固。阿里衮提兵往攻之。連破二柵。餘賊皆逃。是時諸路軍皆大捷。會經略病重。諸將遂欲以是蕞功。阿里衮曰。老官屯有賊柵。前歲額爾登額進攻處也。距此僅一舍。不往破之。何以報命。策馬先行。經略以下皆隨之。賊柵據大坡。週二里許。自坡迤邐下。插於江。柵木皆徑尺。埋土甚深。遇樹則橫貫之。以為柱。柵之外掘深濠三層。濠外又卧橫木之多枝者。銳其末於外。名曰木簽。守禦甚備。我兵阻旬餘。不得進。先用大礮擊之。柵木甚堅。不折。有折者。賊輒補之。哈國興斫箐中老籐。長數百丈者。繫鐵鈎於端。募敢死士夜往鈎其柵。三千人曳籐以裂之。為賊覺。斫籐斷而罷。經略又命火攻。先製檣牌禦鎗礮。一牌可護數十人。以兩人舁而前。十數人各挾薪一束。隨之。百餘牌同時並舉。如牆而進。拔簽越濠。至寨下。方燃火。忽西北風起。火反燒我軍。遂却回。最後遣

兵穴地至其柵底實火藥轟之。柵果突然起高丈餘。賊驚繞喊聲震天。我軍挺鎗抽刀以待。柵破而掩殺無何。柵忽落而平。又起又落。如是者三。不復動。柵如故。蓋立柵之坡斜而下。而地道乃平進。故坡土厚不能迸裂也。然賊自是懼。其柵之插入江者。開水門以通舟。運糧械不絕。阿桂謂如是。則賊終無坐困之日也。撥戰艦五十。越過其柵截之。時阿里衮已病甚。猶力疾攻柵。視鎗礮最多處。輒當之。經略慮其傷。令統舟師以息勞。戰艦整列。賊糧械不得入。由是益懼。其首帥曰。眇枉模者。遣人來乞和。願結柵於兩軍適中之地。請將軍等往莅。眇枉模親來面受要約。經略不許。諸將以兵多染瘴。日有死亡。爭勸受降。撤兵。乃遣哈國興往責眇枉模。以進表納貢。返土司地諸事。議未決。眇枉模左顧而去。哈國興單騎入其柵責之。眇枉模不敢見。別遣人出。請如約。經略遂凱旋。三十五年春。謁上於津門。自請罷劾。上憐其疾。優容之。傳文忠因之。憂恚而卒。總督彭寶遣守備蘇爾相往責前之約。乃被拘留。上大怒。復議興師。以前副將軍阿桂首倡罷兵議。因褫其職。以白衣從軍。會金川蠢動。遂罷南征議。逾四年。金川平。上復命阿桂往雲南。會總督李侍堯相機進兵。會緬酋縱蘇爾相還。其事乃已。至五十四年。緬酋懵駸被弒。其弟孟隕初為僧。國人立之。因遣

使輸誠納貢。遂縱楊重英還。重英自陷緬。獨居蕭寺。幾二十年。未改本朝冠服。上大喜。受降。召緬使朝見於避暑山莊。優賚之。許其十年一次入貢。復重英道銜。比以蘇武之節。御製蘇楊論以旌之。重英尋卒。緬首從此感化臣服。如他屬國馬。

嘯亭雜錄卷之六

清 汲修主人著

平定回部本末

大和卓木波羅泥都。小和卓木霍集占者。其先世本葉爾羌喀什噶爾回首。自策妄阿拉布坦時。即今率其回人至伊犁種地出租賦。遂囚於地牢者數載。我兵平伊犁時。釋使歸。俾仍長所部。二十一年。將軍遣侍衛托倫泰往。未能定要約。阿敏道先使人往招撫波羅泥都。謂霍集占曰。我家三世為準夷所拘。蒙天朝釋歸。得統所部。此恩何可忘也。霍集占曰。我方久困於準夷。今屬中國。則又為人奴。不如自長一方。乃說詞誑阿敏道入庫車城。拘繫之。弗使歸。時方討阿睦爾撒納。兼有青滾雜卜之變。未暇問及也。已而阿敏道復為彼所害。是其負恩肆逆。不可不討。二十三年春。以兆惠富德尚剿洗厄魯特餘孽。乃用雅爾哈善為靖逆將軍。五月。兵至庫車城。賊目阿卜都克勒木據城守。於是趣兵進攻。回人素懦怯。然守城遵古制。雅固書生。未嫻將略。惟聽偏裨等出策。令不畫一。霍集占來救。率最精巴拉烏鎗八千。由阿克蘇之戈壁捷徑而來。與我兵遇於城南。鏖戰竟日。大敗入城。其城依山岡。用柳條沙土密

築而成。礮攻不入。時提督馬得勝獻掘地道計於城北一里掘入。已及城矣。而將軍急於收功。嚴令晝夜力掘。回賊瞥見燈光。其機遂洩。賊匪自內用水灌之。士卒盡沒。雅將軍咄嗟無他策。惟嚴守之。待其自斃。新降回目鄂對告曰。語云。困獸猶鬥。今霍集占困守危城。食力已盡。必不坐而待縛。其必乘我不備。以免脫之。返其巢穴。整兵復來。其事未可量也。今城西渭干愛曼水淺可涉。又有北山口要路。通戈壁走阿克蘇。若於二路各伏兵一千。則賊首成擒矣。雅以其言巨信。唯下令併力攻取。一日暮。索倫老卒於城下牧馬。聞城中駝鳴似負重狀。歸奔告將軍曰。其駝鳴高且健。賊將遁矣。將軍時飲酒笑曰。健卒爾何知。酌酒如故。其夜霍集占開西門。由渭干愛曼涉水遁。果如鄂對言。而我兵未知覺也。後數日。阿拉難爾等開城降。先是霍集占入庫車城。怨鄂對之不附己也。凡其親屬皆殺之。其妻依熱木亦被獲。方少艾。霍集占欲納之。依熱木不從。因縛其二子一女。擲城下撲殺之。因依熱木於高樓。日加窘辱。依熱木乘間逃匿。阿克蘇庫車既降。鄂對手刃其仇三十餘人焉。事聞。純皇帝以雅爾哈善坐守軍營。聽賊去來自如。略不設備。乃革其職。命尚書納木札爾代之。侍郎三泰叅贊軍務。皆馳驛往。又以兆文毅公劄伊犁賊將盡。命即以其兵自伊犁徑

赴回地。上復念北所統兵久勞於外，皆已疲，乃預調索倫察哈爾往濟師。兆文毅至軍，庫車已降於雅將軍阿克蘇，亦遣人迎降。八月二十四日，兆文毅遇雅將軍偕入傳。旨斬順德訥，即前守卡縱霍集占遁去也。逮雅將軍送京，擇城中伯克鄂對隨軍，而留哈密回目玉素富及總兵閔師相率駐兵守。時舒文襄方為兵効力軍前，亦令留阿克蘇督畫諸務。兆文毅即起程，有烏什城伯克霍集斯者，即前縛送達瓦齊者，遣其子呼岱巴爾氏來迎。九月朔，兆文毅至烏什，以霍集斯熟回部事，與同進。葉爾羌分遣侍衛齊凌扎布偕鄂對往撫和闐六城。十月，兆文毅至葉爾羌，其城周十餘里，霍集占已堅壁清野，凡村莊人戶悉移入。初六日，我軍分七隊進，賊兩門各出四五百騎來迎，我兵擊敗之。賊又從北門出數百騎，索倫兵斂然遁，賴健銳營兵數百岸然不動，我兵得以濟。又敗賊衆，賊入城不復出。兆文毅以兵少不能圍城，欲伺便取勝，乃擇有水草處結營，即所謂黑水營也。聞納三二將軍將至，遣愛隆阿以兵八百迎之。又偵知賊蓄在城南棋盤山，欲先取之，以充軍實。十三日，由城南奪橋過河，甫過四百餘兵，橋忽斷，賊出四五千騎來截，步賊萬餘在後，我兵陣而前，騎賊退步，賊以烏鎗進，我兵方擊步賊，而騎賊又從後夾攻，兼有白兩翼衝入者。兆文毅

馬中鎗斃。再易馬。又斃我兵為賊所截。散落成數處。人皆自為戰。無不以死自誓。殺賊無算。而我兵陣亡者亦數百人。受傷者無算。總兵高天喜。副都統三保。護軍統領鄂實。監察御史何泰。侍衛特通額。俱戰歿。日暮收兵。歸護大營。過河者亦泗水歸。馬力疲乏。不能衝殺。遂掘壕結寨守。所掘濠既淺。壘亦甚低。賊可步躡入。遂日夜來攻。我兵處危地。皆死中求生。故殺賊甚力。賊懼我兵致死。欲以不戰收全功。別築一壘於濠外。為長圍守之。如梁宋所謂夾城者。意我兵食盡。當自斃也。而營中掘得窖粟數百石。稍賴以濟。賊又決水灌營。我兵泄之於下游。其水轉資我汲飲。已而隨處掘井。皆得水。又所佔地。林木甚多。薪以供爨。常不乏。賊以烏鎗擊我。其鉛子着樹枝葉間。每砍一樹。輒得數升。反用以擊賊。惟拒守日久。糧日乏。僅瘦駝羸馬。亦將盡。各兵每乘間出掠。回人充食。或有夫婦同擄至者。殺其夫。即令其妻煮之。夜則薦枕席。明日夫肉盡。又殺此婦以食。被殺者皆默然無聲。聽烹割而已。某公性最嗇。會除夕。明忠烈公瑞常中丞鈞皆至。其帳聚語。屈指軍糧。過十日。皆鬼錄矣。某公慨然謂吾出肅州時。有送酒肴者。所餘餽釘。今尚貯皮袋中。呼奴取出。供一啖。時絕糧久。皆大喜。過望。既飽而去。則私謂曰。某公亦不留。此事可知矣。不覺泣下。蓋自十月中旬。被圍。

已將百日。無復生還望也。納義烈公木札爾三公奏。亦以十三日至愛隆阿軍。聞兆

文毅等戰。率二百騎衝入。為賊所殺。兆文毅告急之。文遣索倫兵五人。各持一函。至

阿克蘇。舒文襄公以事急。不暇自計。其身之為兵也。即飛章馳奏。時富將軍德尚在

準噶爾。搜捕餘孽。上命為定邊右副將軍。速往援。會預調之索倫兵已在途。而巴

里坤大臣阿里哀先接兆文毅信。選兵六百。馬二千。駝一千。往赴舒文襄守阿克蘇。

能和輯諸回目。無異志。烏什則霍集斯妻子及總兵丑達駐守。鄂對往撫和闐六城。

亦俱降。十二月。索倫及內地兵已到二千餘。舒文襄先率以行。富將軍德聞兆文毅

被圍之信。亦速赴。二十五日。與舒文襄會於巴爾楚克。二十四年正月六日。至呼爾

瑞。賊五千餘騎迎戰。我兵僅二三千。且馬少。皆步行。發鎗矢斃賊甚多。然賊恃其眾

戰不解。我兵進擊輒退。甫收兵。又來攻。凡轉戰四日夜。磧地無水。皆嚼冰以解渴。初

九日之夜。拒守於沁達爾。勢阻不得進。又幾殆。適阿參政里哀偕鄂博什及馬駝至。

愛隆阿亦以兵從。望見燈火如繁星。知我兵與賊相持處也。阿參政大呼突進。千餘

兵譟而應之。駝一千。馬二千。蹴地聲又壯。賊駭奪氣。阿參政從左。鄂博什從右。入援。

兵驟合。富將軍德乘勢掩殺。賊始大奔。然猶未知兆文毅之存歿也。先數日。兆文毅

軍中見賊之圍守者日漸少。繼又聞數十里外。鎗礮聲。知援兵已至。遂衝壘而出。先使人探報。得達富將軍德壘。詰朝兩軍相見。將軍以下皆無恙。計自去年十月至今。孤軍在萬里外。陷重圍者三月。卒得全。莫不喜極涕出。額手頌聖主如天之福。且因先事調兵。得應期赴援。益服睿算之不可及也。整隊回阿克蘇。賊見我兩路兵合。勢益盛。不復敢邀截。惟遠在數里外。覘望而已。途次聞和闐六城。其二城已陷於賊。兆文毅遣瑚爾起往援之。富將軍德繼進。二城尋復。閏六月。內地所調兵餉俱集。阿克蘇。遂兩路進師。兆文毅往喀什噶爾。富將軍德即由和闐往葉爾羌。兩和卓木已率其眷屬黨與先遁。兩城舊回目遣人至軍前送款。十四日。兆文毅至喀什噶爾。十八日。富將軍德至葉爾羌。各回人皆具鼓吹進羊酒。迎以入。蓋兩酋雖為其部長。然在準噶爾久。惟伊犁種地之回人。同羈旅相倚賴。而舊部本不聯屬。及歸。又虐用其民。以伊犁同歸之人。及厄魯特避兵來投者為親兵。故其竄也。皆相率隨之。舊部人莫有從者。兆文毅既撫定喀什噶爾。尋駐葉爾羌。辦善後事。富將軍阿叅贊。明忠烈。阿文成等追賊。七月七日。及之於阿爾楚爾。大敗之。二十五日。及之於哈喇庫勒。又大敗之。八月十日。至伊西洱庫爾淖兒。乃拔達克山部落接界處也。賊先據山麓。

以待富將軍等麾兵進擊。自己至未賊猶以死拒。乃選烏鎗精利者四十人。自山北而上俯壓之。賊輜重有攀援過山者。有阻於淖兒岸者。方驚懼失措。霍集斯鄂對大呼降者不殺。於是回衆數千。各率其眷屬乞降。聲如奔雷。霍集占禁之不能止。遂遁。是役也。降者萬二千。牲畜萬計。器械無算。兩酋向拔達克山逸去。富將軍德等追入。檄諭其汗素爾坦沙。縛以獻。二十八日。兩酋果往投。素爾坦沙執之。而遣人為兩酋乞命。謂我回部經教。凡派罕帕爾子孫。不得執送人也。富將軍德等脇以兵威。謂不獻則大兵即入。素爾坦沙乃殺兩酋。以霍集占首來獻。其波羅泥都首。為其從人竊去。素爾坦沙旋來降。遣使入覲。回部平。武功大定。頒詔天下。兆文毅公班師歸時。上郊勞於楊武村。行抱見禮。賞賚優厚。封兆文毅為一等公。富將軍德為一等侯。餘遷秩有差。自此葉爾羌諸部警服。如內地臣民。自今甲子周浹。而恭順仍如故也。

臺灣之役

臺灣自古不通中國。文獻通考云。泉州之東有島曰澎湖。澎湖旁有毗舍耶國。蓋即是也。明末為荷蘭夷人所據。國初時。明將鄭成功自江南敗歸。遂取其地以為國。

及其子經。當三逆叛時。屢乘間入犯海疆。先良親王遣吳興祚、姚啟聖等收復金廈二門。康熙二十二年。靖海將軍施琅克澎湖。經憤悒卒。子克塽降。臺灣乃隸版圖。特設臺灣府及臺灣鳳山諸羅三縣。其地東倚山。西傍海。北至雞籠城。南至下淡水。長千餘里。東西闊四五十里。或十餘里。山之東則層巒疊嶂。皆生番所居。打鹿為生。不隸版籍也。康熙六十年。奸民朱一貴叛。水師提督藍廷珍蕩平之。雍正元年。以諸羅北境遼闊。增設彰化縣及淡水同知。六十餘年以來。地大物博。俗日益淫侈。奸宄遂媒孽其間。官斯土者。又日事朘削。會漳泉二府人之僑居者。各分氣類。械鬥至數萬人。官吏不能彈治。水師提督公黃仕簡率兵至。以虛聲脇和。始解散。自是民狃於為亂。豎旗結盟。公行無忌。淡水同知潘凱者。方在署。忽報城外有無名屍當驗。甫出城。即為人所殺。并胥吏殲焉。當事者不能得主名。則詭以生番報。謂番性嗜殺。途遇而戕之也。使人以酒肉誘番出。醉而掩殺之。奏罪人已伏法。而殺人者脫然事外。於是民益輕官吏。而番亦銜怨次骨。乾隆五十一年。彰化縣有林爽文者。恃其所居大理杙地險族繁。恣為盜賊。囊橐閩廣間。故有所謂天地會者。為奸徒結黨名目。爽文借以糾約羣不逞之徒。嘯聚將起事。太守孫景燧至彰化。趣縣令俞峻及副將赫生額。

游擊耿世文。率兵役往捕。不敢入。駐營於五里外大墩。諭村民擒獻。否則村且毀。先焚數小村。忱之。被焚者實無辜也。爽文遂因民之怨。集眾夜攻營。全軍覆沒。赫耿俞皆死焉。時十一月二十七日也。明日賊乘勢陷彰化。孫守及都司王宗武同知長庚前同知劉亨基典史馮啟宗悉為所殺。十二月六日。又陷諸羅。縣令董啟埏死之。淡水同知程峻亦為賊所害。鳳山縣有莊大田者。亦盜魁。乘亂起。十三日陷縣城。縣令湯大奎自刎死。惟府城有總兵柴大紀及監司永福同知楊廷理等率兵民固守。賊屢攻之不能破。而彰化之鹿港賊已遣偽官來監稅。有泉民林湊等起義擒之。是以府城鹿港兩海口俱未失。閩中聞變。時總督雅德被逮。將軍常青本以甯王府長史起家老而耄。以和相私人。故得署督印。時毫無措置。惟檄黃仕簡及陸路提督任承恩入臺擒賊。時黃病初愈。策杖而行。任為金川殉難總兵官任舉之子。少年世蔭。素不知兵。二將軍倉卒入臺。仕簡由廈門渡海入府城。承恩亦由蚶江渡海入鹿港。俱以五十二年正月初旬至。賊勢稍斂。仕簡卧病於簣。因命大紀北取諸羅。總兵官郝壯猷南取鳳山。大紀驍將也。率鄉兵數百。說以大義。轉戰賊寨間。屢擒其首。遂恢復諸羅固守之。壯猷南出二十里。為賊所阻。任承恩之至鹿港也。距大里杙賊巢僅四

十里亦觀望不敢進。壯猷頓兵幾五十日。二月二十一日始進鳳山。鳳山空無人。招民復業。賊即潛入其中。與外賊相應。三月十日城復陷。游擊鄭嵩死焉。壯猷等遁歸府城。先是二月中。上見兩提督彼此觀望。恐不能速殄賊也。有旨命常青往督師。青不得已。遣廷入臺。踞府城。百姓以青為督府。當知兵。人心稍定。閩督李侍堯甫莅任。即預約廣督孫士毅調兵四千備緩急。而鳳山再陷之信至。立即趣兵往。遂以三月末悉抵臺。賊方攻城急。賴以不陷。李侍堯又奏調浙兵三千。上益以駐防滿兵一千。令將軍恒瑞為叅贊。赴府城。提督藍元枚亦為參贊。分浙兵二千赴鹿港。有旨以失律誅郝壯猷。於是諸將咸思進兵。而常青畏蒞。日夜惟涕泣而已。時賊雖猖獗。勢力尚未甚大。各村民俱未為所脇也。而諸將以五月二十四日出師。城中士民咸設犒酒以待。甫交綏。常青戰慄。手不能舉鞭於軍中。大呼曰。賊砍老子頭矣。即策馬遁。諸將因之即退。賊大歡嘯而歸。青入城。即令閉關。又請兵一萬。賊得以暇蠶食各村。不從者輒殺。於是遍域皆賊矣。莊大田驅以擾府城。林爽文驅以擾諸羅。勢益熾。迨官兵從隣省調至。閩又守風過海。凡兩三月。則我兵僅增萬。而賊已增十萬矣。諸羅為南北之中。林爽文必欲陷之。自六月中攻圍。連日夕不止。大紀指揮諸將

云語曰。有城守責者。生死以之。大紀雖武夫。敢棄天子所付之封疆乎。誓與此賊始終可也。因置酒召諸將飲。席間親酌之酒。揮涕拜諸將曰。君等如能堅守固佳。否則斫大紀以降賊。無使蒼生遭鋒鏑也。諸將感激用命。日夜防守甚嚴。時出軍擾賊營。賊用呂公車以數百人牽之。擊城北堞。城上用飛礮碎之。賊復用火箭射雉樓。諸將預蓄水桶。隨手撲滅。賊日夜喧噪以亂軍心。城中鼓角應之。使不得聞。如是者凡百日。諸義民鼓於忠節。各皆出餉勞軍。城賴以濟。大紀數遣敢死士突圍出。請救於常青。青笑曰。若是猷漢。適足以予賊始快余心也。終不發兵救之。副將蔡攀龍請行。

上復嚴旨督責。青不得已。命孱弱兵數百。使攀龍率之往援。咸歿於敵。惟蔡僅得入城。諸羅之圍益密。入者不能再出。大紀告急之文。用小字書寸紙。募人間道夜行。始得達府。而賊禁粒米不得入城。城中士庶已飢疲不能支。上諭大紀命拔身出。大

紀以士庶已共守久。恐遭賊屠戮。誓死不出。奏聞。上垂泣曰。大紀忠誠。雖古名

將。何以復加。所謂我君臣各盡其道也。因封大紀為一等嘉義伯。世襲罔替。賜銀一萬兩。念諸羅被圍久。特改名嘉義以旌士民。時常青在府城。欲棄城遁者再。賴諸將護持。因密札哀乞和相。請以他將往代。和相晏見奏之。上亦預燭青必債事。六月

中。即調陝督福康安為將軍。及領侍衛內大臣海蘭察來統兵。并發明詔。聲言調兵十餘萬來滅賊。冬十月。所調蜀番及粵西兵共五千。先至。有旨官兵不必至府城。當即往鹿港進。會颶風不得渡。守風於崇武澳。二十八日。忽得順風。一晝夜。數百艘盡抵鹿港。海口檣竿如櫛。列數里。賊聞之不測多寡。謂真有十萬兵至。始懼。十一月八日。福康安等起行。賊方列拒於崙仔頂。海蘭察率巴圖魯侍衛發矢。殪數十賊。賊大驚曰。是何老騎兵強壯乃爾。遂即披靡。海蘭察笑曰。此一羣犬耳。何畏之有。遂麾兵入。蓋時常青偽造蜚語。謂賊有異術。實不可搜。福康安亦先惑其言。至是始知其妄。乃沿路復擊殺之。伺隙者至牛稠山再敗之。即以是日抵嘉義。城中官民出迎。飢羸無人色。見福至。無不欵歔啜泣。喜其來而悲其晚也。惟大紀以功高與福康安抗。行賓主禮。康安銜之。遂密奏其人奸詐難信。會侍郎德成自海上監修城垣歸。復媒孽大紀之短。上信其言。遂以前貪縱事。逮大紀及永福。入先後正法。而大紀部下諸將李長庚王得祿邱良功等。後皆有所建樹。立功海上。蓋承大紀訓也。嘉義城北有山。名小半天者。四面陡絕。賊遁而聚於此。十八日。福康安率將士百道仰攻。又克之。賊自猖亂以來。徂見常青畏怯。以官軍不足畏。不虞此次之難抗也。遂遁歸大里。

杙賊巢已築土城堅固。二十四日官兵至。賊猶數萬出拒。退而復集者數次。既夕。我兵伏溝坎間。賊執炬來索戰。我兵在暗中。賊不能見。而我兵視賊。則歷歷可數。發鎗箭無不中賊。賊自知失計。遠滅火。復擊鼓來攻。我兵又從鼓聲處擊之。殺死無算。黎明進兵。遂克其城。林爽文已攜孥走據守集集埔。其地前臨大溪。溪之上就高岸。壘石為陡牆。長數里。其所預營阨險處也。十二月五日。官兵騰而上。殺千餘人。於是賊黨皆潰。林爽文先匿其妻孥於番社。惟與死黨數十人竄窮谷叢箐中。十三日。先獲其孥。福康安又遣使入大山。忱以兵威。生番懼。遂獻爽文出。而莊大田雖與林爽文同逆。又各自號召不相下。乘官兵未南。益焚掠聚糧為旅拒計。己又思出降。計未定。而福康安已於十六日抵牛莊。大田倉猝出拒。敗而走。官軍連蹙之。累戰皆捷。極南有地名郎嶠者。負山臨海。最遼阻。莊大田力不支。與其黨潛匿焉。福康安先遣水師由海道繞而截之於水。自以大兵環山圍之。賊衝突不能出。陣殺者數千。溺海者數千。擒而戮者亦數千。莊大田遂就獲。臺灣平。上大喜。封福康安為一等嘉勇公。賜寶石頂四團龍補服紫韉轡以旌之。其餘將士皆優賚焉。常青以失機被逮。復以重賄賂和相。和以其年老多病。語奏。上宥之。踰年復為禮部尚書。卒終於任。至今臺

民猶有餘憾焉。

癸酉之變

白蓮邪教起自元末紅巾之亂。明季唐賽兒徐鴻儒等相沿不絕。蓋由狐怪所傳。其經卷皆盜襲釋氏之文。而鄙褻不成文理。又以真空家鄉無生父母八字為真言。書於白絹。暗室供之。其教以道祖為重。又有天魔女諸名位。以持齋修善為名。而暗蓄逆志。謀為不軌。其教自京畿迤南。學習者眾。乾隆中。傅文忠任九門提督時。曾捕獲黃村妖婦某氏伏法。其黨懲治有差。其風稍熄。而蔓延至楚豫秦蜀諸省。遂有嘉慶丙辰。楚北揭竿之亂。兵興九載。然後撲滅。其傳習京畿者。久而益熾。又變為八卦榮華。紅陽白陽諸名。大吏相安無事。不復根究。有林清者。本籍浙江人。久居京邸。住京南宋家莊。幼為王提督炳弄童。隨王於苗疆久。頗解武伎。遂為彼教所推。尊為法祖。其人頗身顰面髯。張如蝟。自以智謀過人。其實愚魯異常。因掌教久。積募銀米家業頗豐。遂蓄不逞之志。大內太監多河間諸縣人。有劉金劉得才等。其家即素習邪教者。選入禁中。遂與茶房太監楊進忠等傳教。羽翼頗眾。因與林清交結。會辛未秋。彗星出西北方。欽天監又奏改癸酉閏八月於次春二月。諸賊乃以為預兆。又其

經有八月中秋黃花落地語。遂附會其說以為本朝不宜閏八月。故欽天監改之。而不知康熙戊戌久有之也。楊進忠頎而長。面目兇險。遂以鑄軍器為己任。暗於宣武門鐵市中鑄刀數百柄。林清邀結其黨數千人。其中祝現屈五劉第五劉呈祥支進財陳爽李五等為巨魁。遂與劉進財等暗約。於九月十五日午時入禁城起事。有漢軍獨石口都司曹倫者。侍郎曹瑛後也。家素貧。嘗得林清飲助。遂入賊黨。適之任所。乃命其子曹福昌勾連不軌之徒。許為城中內應。福昌欲於十七日起事。蓋以是日。上駐蹕白澗。諸王大臣皆往迎。鑾乘其間也。而林清狃於經言。未及改期。本欲聚數百人入。而諸逆監以為大內地不廣濶。難容多人。又妄恃林清果有邪術。可以致勝。而清又倚賴諸逆監諳熟。禁中路以為導引。遂以二百人為額。然其人皆市井無賴。初無智略。又其謀不慎秘。頗為人知。林清嘗步行街衢。風聞其袂。露懸坎卦腰牌。為市人所窺見。又飲於友人室。醉後露大逆語。然諸有司皆以株連太監。故不敢究詰。至黃村同知張步高與林清結為昆仲。以希他計。吁可怪也。其黨祝現者。本豫王包衣人。居桑堡村。充豫王庄頭。家頗豐。其弟祝嵩慶頗不善。兄所為。知其反期已決。奔告豫王。豫王裕豐初欲舉發。會有尼之者。豫王於壬申年。上大閱。

南海子曰。亦曾寓宿林清家中。故匿不敢奏聞。蘆溝司巡檢陳紹榮。因居民逃竄。訪知其謀。於數日前申報宛平縣。縣令某已有發派弓兵翁同擒剿之札。會亦不果。步軍統領吉倫。貪吏也。營員久相申報。吉倫以事干。禁鑿不肯究訊。數日前方攜酒游香界寺。吟咏竟日。託言迎鑾白澗。是日驕從出都門。有左營參將某攀輿以告曰。都中情形。大有所叵測。尚書請留以為民望。吉倫正襟厲色曰。近日太平乃爾。爾作此瘋語耶。揮輿竟去。十四日。林清賊黨分二隊。其東自董村至者。以祝現屈五為首。約由東華門而入。其西自黃村至者。以李五宋進財為首。約於菜市口齊集。由西華門而入。正陽門外開慶隆戲園。劉姓者。亦其黨羽。曾投逆職為巡城御史。是日延李五等入其戲園觀劇。酣飲竟日。而營坊諸官。莫有過而問者。其去木偶幾希矣。十五日午。太監劉得財。引祝現等由東華門入。會有賣煤者與之爭道。賊脫衣露刃。為司閤官兵覺察。驟掩其扉。賊喧然出。刃闌入者。陳爽等十數人。屈五等皆遁逃。有今禮部侍郎覺羅公寶興者。侍直上書房。甫退直出。適遇賊舞刀入。白光燦然。寶跟踉蹌奔入。時署護軍統領為楊述曾。漢軍人。由參領起家。初無智略。因率數護軍禦之。殺數賊於協和門下。而官兵受傷者亦多。寶侍郎遂命掩。景運門入告。皇次子。

皇次子從容佈置命侍者攜烏鎗入並嚴命 禁城四門促官兵入捕賊劉得財

引二賊入 蒼震門欲手刃太監督領侍常永貴洩其夙忿為太監顧某擊擒之其

由西華門入者時倉卒門不及闔遂全隊入楊進忠與其徒高廣福引之尚衣監為

製 上服處楊嘗乞其補綴而不與值司衣者拒之楊以是隙遂引賊入全行屠害

存者無幾有老婦數人藏於荆棘中獲免遂入文頴館殺供事數人陶鳧鄉編修梁

方校書聞門外履聲橐然突然問曰金鑾殿在何所其愚蠢也若此陶僕駱升方提

茶盃至遂以身障鳧鄉賊傷數刀鳧鄉得以免其賊遂叢集 隆宗門門已闔有護

軍某知事急懷合符於身亦被數刀懵然卧階下合符得以保全賊由門外諸廊房

得踰牆闖 大內 皇次子立養心殿階下以烏鎗擊斃二賊貝勒綿志亦趨入隨

皇次子捕賊復有二賊潛入內膳房屋中眾內監擊殺之時諸王大臣聞變皆由

神武門入余在邸方與僮手奕聞變騎馬入至 神武門莊親王綿課貝子奕紹

亦先後趨至聞賊已聚攻 隆宗門納蘭侍郎玉麟方迎 駕歸短衣踉蹌入皆聚

集城隍廟門前時官兵至者未踰百人餘皆僕隸而已眾錯愕無策鎮國公奕灝勇

士也掌火器營事因曰是日火器營官兵皆聚集箭亭以備揀出征時有滑可招而

至也。余應聲曰：君言大是。伊乃騁騎去。時鎮國公

永玉

護軍統領石瑞齡曰：

禁內

隘窄。恐有不測之變。可速備車乘以備。

后妃之行。余亦是其言。宗室原任大學士

祿康首拂其論曰：此係何等語。乃敢出口耶。眾皆默然。其心實叵測也。成親王

後至時已被酒。乃大呼曰：何等草寇。敢猖獗乃爾。賊在何處。俟吾手擊之。因脫帽露

永理

頂勢甚雄偉。時內監有言賊甚兇猛已攻。中正殿門入者。約計二百餘人。蓋即其

黨也。亦實有醞良輩。登延薰閣數十人。眺覽於外。屢促官兵。聲淚俱下。惜不知其名

也。須臾。奔灑率火器營官兵入。凡千餘人。魚貫橫鎗。意甚踴躍。實。祖宗百年涵養

之功也。莊王因率百餘人。並矛手數十。從西城根進。余在後督率官兵。後至者勵以

大義。皆奮勇前進。副都統公安成者。超勇公海蘭察子也。少年勇銳。時方徐行。余撫

其背曰：君乃勳臣世蔭。不可有墜家聲。安乃奮勇而前。遙聞鎗聲。砉然知官兵已對

敵也。時有數十賊入。慈甯宮伙房者。莊王首射一賊。應弦而倒。官兵復鎗傷數人。

賊遂披靡。莊王同安成奕灑先後追至。隆宗門賊首李五祝現。方積直宿者之襍

被於簷下。意欲縱火。莊王率眾攻之。擒獲數賊。其餘皆由南遁去。時副都統蘇公

爾

慎鈕鈷祿公格布舍。方銜。命南征。入京。整行裝者。聞警趨入。亦首先殺賊。有侍衛

慎鈕鈷祿公格布舍。方銜。命南征。入京。整行裝者。聞警趨入。亦首先殺賊。有侍衛

那倫者。納蘭太傅明珠後也。少時家巨富。凡滌面銀器。日易其一。晚年貧窶。一冠數十年。人爭笑之。是日應值太和門。聞警趨入。時有勸其緩行者。那故迂直。曰。國家世臣。當此等事。敢不急赴所守耶。因急趨至熙和門。門已閉。那方傍皇間。適賊蓬至。遂被害。高廣福時雜於眾賊中。因引賊由馬道上城。腰出白旗。搖展。或書大明天順。或書順天保民。皆庸劣可哂。以白布裹首。呼號於雉堞間。奔灑蘇爾慎。因上城。驅逐高廣福。持旗呼眾間。奕灑彎弓射之。自城樓墜殞。眾聲歡忭如雷。有御書處蘇拉某。乃導李五匿於御刻石榻間。余督後兵。自武英殿複道進。有理藩院員外郎岳祥。海蘭察之壻也。貌甚勇健。與余路遇。願從殺賊。時賊有迎拒者。鑲藍旗護軍校常山。以鎗擊之。墜於御河山。即入河擒之。余即與之手絹。以為識。眾愈踴躍。時擒斃賊數十。官兵之勢愈盛。賊有自投御河死者。有匿於城堞草中者。有匿於五鳳樓者。如鳥獸散。時天殆黑。與今禮部尚書穆公克登阿遇。穆驟曰。天已昏黑。奈何。余曰。今十五夜。有月光照曜。蓋安眾心也。穆固長者。不解余意。因曰。月光終不及日。余即指心以示穆。乃改曰。月光固皎如晝也。時諸王大臣。皆黽勉從事。然亦有日落始至者。亦有逍遙雅步於御河岸者。以天潢貴胄之近。而漠然如越人之視亦

可謂無心肝人矣。鈕鈞祿宗伯慶福修髯垂腹。公服挂珠正襟坐於軍機處階上。人

問之曰。今日望日。敢不公服。其迂執也。若此。時莊王等皆入。隆宗門內。余念西華

門為賊突入之所。恐其乘夜奪門出。因率火器營兵數百。屯於門側。會成王命護軍

統領石瑞齡。義烈公慶祥。散秩大臣繇懷。副都統策凌。分守四禁門。慶公祥乃率

其所管正藍旗護軍營弁兵。至西華門。會英誠公福克謹。原任禮部侍郎哈甯阿。皆

偕至。慶固多才智。其營參領趕興。為緬中失節之德森保子。人亦勇健。思幹父盡。因

與余露宿馳道上。中夜時有太監張泰者。即於己巳春同鄂羅裡共傾陷廣慶。虞侍

郎者。時亦通賊。由城堞蛇行。伏於東華門馬道上。為弈灝所擒。始知有內監通賊狀。

此十五日事也。至五更。月色皎潔如晝。余與慶公。命岳祥率數十兵上城。巡眺慶公

又命長槍手數十。拒守西華門洞。終夜間寒風凜然。內務府衙門中。尚有佚賊。砍某

郎中肩逃去。聞大城內柝聲叢雜。竟夜不絕。蓋玉念農侍郎率步兵巡邏。甚嚴密。天

殆明。烏雲自西北起。霹靂轟然。人皆辟易。俄而大雨如注。軍士火繩俱滅。聞五鳳

樓中有人沸聲。余命火鎗齊發。然雨勢甚大。因退屯咸安宮門下。是時兵弁無不

怨。兩非時者。後知是夜逸賊匿於五鳳樓者。欲於是時縱火突出。會聞雷聲。驚潰。

雨復滅其火種固。國家無疆之福。天有以佑之也。天始明有南薰殿人報其中
有賊者。余率兵十數人入其柵內。余立土墩上指揮其眾。有正紅旗火器營護軍校
福祿者。冒險入。擒數賊出。賊有攀樹踰垣者。亦為兵弁所獲。有名史進忠者。人甚黠。
余因命岳祥以善語誘之。其始言姓劉。蓋以劉得財為可恃也。久之始得林清名。姓
及李五。祝現率眾入西華門。語會莊王。率長槍手數十人擁至。余告其故。王曰。適纔
弈公灝亦於錫慶門前訊問。陳爽供與之合。余因與之籌畫兵食。王蹙額曰。內務
府倉中。現不發糧。奈何。可命余護衛向街巷中市餅餌。聊充竟日之食可也。因率眾
巡邏去。今戶部侍郎宗室果齊斯歡至。衣襟盡血。云余適才巡至五鳳樓。見一賊
匿於扉側。余往擒之。賊挺刃至。被余手刃之。氣色甚壯。果為壬戌宗室進士。勇健乃
爾。不負維城裔也。因耳語余曰。聞有內監通賊者。王慎勿泄。余首肯者。再慶公因問
果告如初。因共嗟歎。刑餘之輩。歷代無狀。乃爾。本朝立制。綦嚴。乃敢萌叛逆之心。
至此恨不共餐其肉也。時天已晴霽。余因親同岳祥上城巡視。見正紅旗兵列營於
西華門。軍容甚肅。余憑堞問。乃康副軍修隊也。午間莊王親至。散給餅餌。數人共一
枚。不足充飢。余與慶公議。因修書寄家中。命運米數十石。以供軍食。從門隙投出。至

晚米始至。軍士飽餐歡然。日落時有火器營領札某入。

御書處巡視聞石隙中有

人語。出呼兵入。慶公命趕興持刀首入。眾兵奔隨之。余與慶福二公往拒其門。賊出與門官兵踴躍擒捕。如巢中捕雀焉。魚貫累然。擒出凡二十四人。首謀之蘇拉亦與焉。余訊之。彼戰慄無人色。李五甚狡捷。與官兵格殺被傷甚重。是夜斃焉。官兵歡聲如雷。士氣益壯。聞是日豫王裕豐及原任大學士祿康託言出購軍食。竟開東華門出。須臾乃徒手歸。言無炊飯處。竟不知作何狀也。黃昏時。訛言有賊犯西長安門者。慶公與余同鼓勵將士。命列隊以待。兵士有驚詫者。余欲正法。眾乃帖服久之。始知為古北口提督馬瑜率兵由密雲至京城北。塵土蔽天。致有此訛傳也。晚間莊王入告督領侍常永貴。因擒劉得財數十人出。皆俯首服罪。此十六日事也。次日昧爽。上遣和碩額駙超勇親王拉旺多爾濟和碩額駙科爾沁郡王索諾木多布齋固倫額駙固山貝子瑪尼巴達爾。今大學士託公津。今吏部尚書英公和。先後入京。蓋於路次聞警報也。命八旗都統各於界域中擒捕逆匪。恐有逸賊潛大城中也。時各

都統聞

命皆趨出。惟成莊二王及奕灝安成等數人未動。殊有識也。時莊王已將

林清名姓居址密札告王侍郎

麟會英公

和至已

授步軍統領。因命番役張吉高鐸

徐永功三人往宋家莊擒捕林清。會有宋某舉發其事。因命為引導。時由東華門潰散者。已歸告林清。清躊躇竟夕不寐。繞牀嗟歎。然猶希冀曹福昌之逆黨應承於十七日起事者。或有所倣幸。因未逃遁。黎明時。張吉等三人已至其家。扉尚闔。張扣扃久之。林清着燕服出。張吉偽告曰。城中事已有成。奉相公命。延請入朝。清大喜。過望。欲登車。其姊闖然出曰。事吉凶未可知。不可獨往。張高等推婦仆地。遂驅車返。婦踉蹌歸。命數十人追之。車已入南苑門。門隨掩。追者無及返。是日停午。忽傳上自燕郊迴鑾逾時。遍禁城皆知之。貝勒綿志持鑰立東華門樓上。仰望景運門。皆洞開。久之。聲跡杳然。蓋即福昌之黨所為也。余方假寐。聞之不及着靴。趨出。慶公曰。事關巨大。我等有城守責。不可擅離。恐有他故也。余心是其言。是時諸王大臣於各偏僻處搜捕。先後又獲十餘賊。有劉姓者。縛卧隆宗門側。聞火鎗聲。自相怨艾曰。吾早言是物兇狠。終不能成事。若輩不聽好語至此。可見賊眾皆烏合而至也。然始終不獲祝現。劉呈祥二人。或曰死于東華門。着青衣者。類呈祥。然無左驗。至祝現踪跡詭密。必有逆黨藏匿之者。其事不可深詰也。是日諭旨至。深獎皇次子之功。在社稷封智親王。貝勒綿志以扈翌功。亦封郡王職銜。賞食俸銀一千兩。又擇於

十九日 迴鑾 命諸王大臣毋庸遠接。以靖人心。是日莊王率兵出巡九門歸。人

心稍定。晚間驟聞 禁城外喧嘩聲。俄時遍滿街巷。訛言太平湖在城西業經接戰

又云西長安門已破。遍都城人聲沸騰。時科爾沁貝勒鄂爾哲依圖有母喪。聞變。墨

練守神武門外。紀律頗嚴。俄有冠五品頂戴花翎人駛馬至。云欲調官兵出 禁城

禦賊。鄂詢之。即趨去。又有騎白馬人沿街傳呼有賊。蓋即福昌之黨羽。期於是夜舉

事者。果益亭侍郎守西柵欄。有其營兵校報賊至者。果立縛杖之。時大僚有欲啟

神武門出兵者。幸為莊王所阻。守 午門之策凌聞變。竟率兵開門首遁。賴 皇次

子遣安成巡察至 午門。聞無一人。歸報 皇次子。改命公舒明阿代守之。舒招集

前兵固守。得以無虞。此安成親告余者。是夜余聞變。亦愀然變色。賴慶公撫御士卒。

列隊以待。命岳祥趕興上城瞭望。謂余曰。此隊文武二員。殊可嘉也。俄而大風翁翳

新寒侵骨。至夜半。人聲漸息。實無一賊。焚掠。蓋賊黨煽惑。使我兵自踐踏也。聞是夜

北城有兵家。其夫出守 禁城。而家無一人。其妻聞變自縊者。又聞有全家殉節者。

惜不知其名。最可詫者。策凌之逃。合朝無人舉劾。而是夜倡亂者。惟擒曹福昌一人。

餘皆不為究詰。司寇訊曹倫父子時。亦未有一人問及此夜之事。反代林清云。欲俟

滑縣李文成賊至之語以誑君父。此余之所未解者。此十七日之事也。至次早。北風淒緊。日色無光。士皆披裘立。尚寒慄無人色。所擒賊有凍斃者。其餘哀號之聲不止。慶公曰。余不忍聞也。余曰。此皆碎屍不足以洩吾憤者。君可謂牙牙之仁也。慶亦韞然。時同至文穎館。始知陶鳧鄉尚在。匿於櫃中。絕糧已三日矣。至晚。秋卿始命司員錄諸賊生供。然後啟神武門。遞送諸賊于獄中。是日。余至克勤郡王寓中。始食秋梨數枚。前此食不下咽也。此十八日事也。明日。余同諸王公迎駕於朝陽門內。常服挂珠。用兵禮也。辰刻。上乘馬入都門。夾路士卒歡拜。重覩聖顏。余不禁潸然泣下也。上撫御士卒。緩轡入宮。即下罪己詔。諸王公大臣集乾清門。跪讀。不禁嗚咽失聲。唯鐵冶亭宗伯云。我輩若此。盡職而皇上惟言叢脞。何也。人知其志荒矣。上立命開內外城諸門。以安人心。又特賜將士食。命御前侍衛等視食畢。然後復命。又命莊王及貝子奕紹等入太廟。社稷諸宮殿。搜捕餘賊。次日。召王公大臣於乾清宮面諭。近日諸大臣因循怠玩。有為朕宣勞者。眾必陰擠殺之。以致有此大變。余首奏曰。皇上此言真切。中今日之病。然臣等世受國恩。乃使今日有此等事。真愧死矣。上首肯者再。又言前日朕聞報時。即

命迴鑾。皇父陵寢在咫尺間亦不能謁前訛言有賊三千直犯御營之語。

朕諭御前王大臣不必驚懼俟賊果至汝等効死禦之朕立馬觀之可也。因言我

大清以前何等強盛今乃致有此事皆朕涼德之咎。眾皆嗚咽痛哭叩首請罪。成王

因言皇上如此聖明百姓縱不能愛戴如父母何以疾之如寇仇此必有所致禍

之根容臣密奏也。上可曰兄可急繕奏聞王大臣中如有能據忠悃者可繕摺以

奏待朕裁定。眾叩頭謝。上又曰此中亦真有為朕出力者朕習知之不必因此

生怠也。眾又叩首出時有欲合避邪丸藥使諸內監服之以却其邪謀者。繼又作爾

汝之辭。上皆笑而不答。既出余笑謂成王曰此何異楊武陵默誦華嚴却賊之故

智也。成王粲然曰伊之才何得譬武陵。直郭京申甫流耳。因脫帽擲床上。眾皆軒渠

是時拉旺多爾濟等奉旨率健銳營兵弁往剿東董村及宋家庄諸處賊已棄巢

逃竄。超勇王遂聚火焚其室。終夜火光燦然。京兆尹以賊人嘯聚請獨對。而超勇王

等適率勁旅凱旋其漫無聞見至此。巡城御史曹恩繹陸泌遣偵者巡邏於右安門

獲太監楊進忠家書始知其通逆謀。蓋伊引賊入見莊王率勁旅至伊即逃入直房

閉門晏寢。至是事定始遣僕通信於其家乃被獲。實天意也。上命承恩公和公世

奏至其家搜刀布出乃伏法。二十三日。上御豐澤園親訊逆黨。諸御前侍衛佩刀環立。威儀甚肅。上命莊超勇二王坐於御座側。引劉進財劉金至。上問曰。汝

等皆朕內侍。朕有何待錯。汝等乃萌此逆謀也。二閹賊俯首稱。主子饒命者再。上

笑曰。汝既順林清。應與朕作爾汝之辭。何得尚稱君上。二賊無詞。上因命夾打畢。牽去。復引林清至。上問其何故蓄逆謀。林清曰。我輩經上有之。我欲使同輩突入

禁門。殺害官兵。以應劫數。上又訊問其黨。清曰。有包衣人祝現為黨中巨魁。

上因回顧刑部諸臣。問祝現何在。尚書崇祿奏曰。業經正法。侍郎宋公銘奏曰。尚未

緝獲。上首肯之。因顧莊王曰。外間訛言太監皆叛。今日審明。除此數逆外。朕之內侍非盡叛也。玉音申諭者再。蓋安反側心也。因命將林清等即時正法。遂起立。眾

扈從入宮。余是日亦佩刀隨往。目擊其事。後乃有妄言林清有諸邪術。及諸悖逆

不服之言。皆齊東語也。其後步軍統領五城御史等。陸續捕獲從逆賊黨。上優賚

陞擢有差。乃革吉倫玉麟職。其日未及入禁城之大臣。大學士劉權之。刑部尚書

祖之望。禮部尚書王懿修等。皆命致仕。副都統楊述曾。以其協和門捕賊功。宥

死。戍於邊。護軍統領明志。以是日入直者。乃其所屬。亦革職。發往東陵贊禮郎上

行走。後於十月間。步軍統領英公和。因訪獲曹福昌從逆有証。遂逮其父曹倫至。御訊於豐澤園。即時正法。以失察故。革祿康裕瑞職。發往盛京居住。曹福昌臨刑時。告劄子曰。我是可交之人。至死不賣友以求生也。此英誠公福克進親聞知者也。逾年裕豐匿告事發。革其王爵。其黨雖陸續就擒。然祝現劉第五至今逋逃漏網。尚未明正典刑。殊使人憤悒也。嗚呼。林清一妄男子耳。焉有當此海宇昇平之日。聚數百不逞之徒。乃欲直犯禁闕。圖謀不軌。洪荒以來。有此事乎。而兇狠之輩。聽其恣憑指揮。甘罹危險。以圖徼倖。於必不能成之計。亦可謂至愚矣。

滑縣之捷

河南滑縣地鄰直東三省。易於藏奸。有李文成者。素習白蓮教。為若輩所推服。與林清相勾通。約於九月中起事。有縣吏牛亮臣。主計馮克善。皆與逆謀。又有宋元成。身軀壯偉。多黠智。乃勾通東昌曹州大名諸逆賊。時又有曹福昌。劉得財。黨羽內應之舉。諸賊恃為泰山。有司有知之者。皆不敢舉發。滑縣知縣強克捷。陝西韓城人。中戊辰進士。人素忠梗。乃收捕李文成於獄。根究結黨逆謀。上司有阻之者。強不為所撼。牛亮臣宋元成。遂糾結賊眾。於九月初九日。劫獄入署。強聞難。朝服立於堂中。以大

義責之曰汝輩皆朝廷赤子奈何崇信邪教甘謀不軌自古紅巾幾見有為帝王者乃為此滅族之計吾為汝父母官應代為悲也眾有惑其惠者不忍戕害宋元成首犯強公因屠害家屬數十人其媳徐氏美而豔賊欲犯之徐瞋目大罵怒嚙賊背賊怒醢其軀刳文成出獄遂據城叛時欲結隊北上有教諭呂某佯降賊因給之曰昔川楚教匪蔓延九年所以終為官兵撲滅者因其不據城池無所固守故也今可高築雉堞閉關自守以待他郡接援然後會師北上始能保萬全也賊信其說遂屯聚道口諸村堡以為聲援計事聞上命直督溫承惠為總統率古北口提督馬瑜及護軍統領富蘭副都統格布舍蘇爾慎等率直隸河南等處綠營兵以討之溫馳至正定聞禁城變復率兵歸保定上以其失察林清及逗遛故褫其職改命陝督那彥成督師命簡健銳火器二營兵二千名命侍郎公慶祥副都統御前侍衛桑吉斯塔爾副都統積德長慶等率之往時山東東昌亦有應之者賴鹽運使劉清副將馬建紀張拱辰等率兵抵禦誅夷無算上又命固原提督楊遇春率陝中兵討賊楊固宿將所統兵皆降賊技勇熟練身經百戰者楊善為撫馭得其死力時河南巡撫高杞被圍於濬縣富蘭等統兵救之圍乃解那繹堂馳至軍請申明紀律

檄調各省兵馬。上責其逗遛。那謂人曰。不教而戰。是殃民也。昔川楚之所以失事者。皆兵力未集。而遽與之戰。反為所敗。是以人心震懾。不敢復櫻其鋒。以致蔓延日久也。今吾當厚集兵力。一鼓滅之。遂屯河陽。未進。楊遇春領關西兵至。先率數騎馳入賊壘。遍觀形勢。曰。烏合之眾。易擒也。會吉林黑龍江勁旅至。遂于十一月二十日。攻破道口諸賊壘。時李文成於官兵未合圍時。已驅車遁。以被知縣強公夾傷。故遷延不能速行。那繹堂命總兵特順保楊芳。副都統德英額等追之。李文成遁入林縣司寨。山中徑路曲險。賴獲土人導之以進。官兵有潰散者。賴楊芳斬數騎。人始用命。四面合攻。自辰至酉。賊勢稍衰。我兵得以前進。賊皆潰散。墜澗壑死者無算。屍與澗平。我兵踏賊腹背以進。李文成知事急。自焚死。司寨之賊始盡。其據城者。猶日將白旗招颺。以期外援。時將林清等之首示之。賊皆以為偽。以林清內有奧援。其事定當早成。其愚闇也。若此。宋元成遂遣馮克善潛出圍北。上以偵林清事之成敗。及號召其黨羽。至河間旅店中。為知縣張翔所獲。時上命今大學士託公津馳赴大名。率富蘭馬瑜等討長垣諸賊。以次撲滅。那繹堂用楊時齋提督掘地道計。初於城西北掘之。為賊所破。復於西南隅掘之。既熟。城轟然崩墮。楊時齋持皂旗首登堞。桑吉斯

塔爾繼之。會城隅關帝廟被焚。火光照如白晝。我兵乘勝無不用命。那繹堂與高公祀登土阜督率進兵。至天明屠戮賊人殆盡。於破屋中擒牛亮臣徐安國二賊首。賊畏懼無不延頸受戮。積尸若山阜。凡九十日。滑縣乃平。教諭呂某亦自縊死。事聞上大悅。封邦彥成三等子。賜雙眼花翎。楊遇春二等男。高祀一等輕車都尉。餘皆優賚有差。近年用兵未有若是之速者。因卹強公。賜謚忠烈。建專祠以祀之。賊初起時。余告當事者。即憂其四出奔突。難以追逐。後聞其據城自守。已知其無能為明參政亮。初慮亦與余合。後知其計左。因謂余曰。賊自趨滅亡。孤城致斃。此兵法所最忌者。此時雖命余呼賊為兄。亦所情願也。余亦大笑。後果符余二人所料云。

廓爾喀之降

廓爾喀自古不通中國。烏斯藏以西一大部也。烏斯藏即古佛國。今分為前後兩藏。自蜀省打箭爐西行七十二驛。至前藏。又十二驛。至後藏。又十二驛。至濟隴。又三十驛。至石宿橋。為後藏極邊地。過橋以西。則廓爾喀矣。前藏有胡土克圖。曰達賴喇嘛。相傳為宗卡布及門高徒。世世轉輪為之。每將死。則自言其往生處。其弟子如言物色之。得嬰兒。即奉以歸。謂前喇嘛所託生也。其真偽不可知。而準噶爾喀爾喀及內

部落各蒙古王公皆尊信之。為佛教大宗。後藏班禪額爾德尼。其名位視達賴喇嘛稍次。而諸蒙古番人亦崇奉惟謹。此二藏古吐番地。元世祖時有八思巴專為帝師。明成祖時有哈麻立冊為大寶法王。未嘗待以屬禮也。我朝文皇帝時。達賴喇嘛知大東有聖人出。遣使萬里相朝賀。其後為厄魯特所劫去。聖祖仁皇帝命皇十四子允禵為大將軍。統兵入藏。收復其地。擁達賴喇嘛歸。坐牀於布達拉。以為綏安蒙古之計。初有番目頗羅鼐以功封王爵。統兩藏事。其子朱爾默特叛。事見後卷遂不復封王。以藏事統歸達賴喇嘛及班禪管理。於是以教主兼國王之事。尤荷天朝以為重。有丹津班珠爾者。本班禪部下頭人。以罪被黥。竄入廓爾喀。結其酋喇特木巴珠爾。復以通商事。後藏人倚班禪勢。不與其值。遂相結怨其人。突入後藏據之。此乾隆五十三年事也。純皇帝命川督鄂輝。成都將軍成德。統兵剿之。又以理藩院侍郎巴忠通諳番人語。遂命監其軍。巴忠自恃為近臣。不復為鄂成二人所統屬。遂自遣番人與廓爾喀講和。願歲納元寶一千錠。以贖其地。廓爾喀欲立券約。以為憑信。時達賴喇嘛以為不可。而巴忠欲速了其局。遂如約而歸。逾年。廓爾喀頭人索歲幣。達賴喇嘛不與。具有呈進表文。語不恭順。復為駐藏大臣普福匿不以聞。廓

爾喀頭人遂刦藏中頭目瑪爾沁以為質。復搆兵入後藏。擄掠而歸。駐藏大臣保泰擁兵不救。併欲棄前藏歸。賴達賴喇嘛不肯輕棄重器。以免事聞。上震怒。巴忠畏罪。投河自斃。乃命禔保泰爵。改名倂習渾。國語所謂賤役也。乃命粵督福康安領侍衛內大臣。海蘭察為大將軍。統索倫吉林及川陝諸路兵入討之。其糧餉則命大學士孫士毅主藏東路。駐藏大臣和琳主藏西路。濟隴以外。則惠齡主之。五十七年春。福康安由青海路進兵。時青草未茂。馬皆瘠疲。糧餉屢絕。運糧布政使受和坤指。欲絕其餉。以令其自斃。賴福康安行走速疾。於四旬至前藏。以四月乙未出師。先遣領隊大臣成德岱森保由聶拉木進。總兵諸神保駐絨轄。防其抄襲後路。福康安海蘭察二人。與賊戰於擦木。戰於瑪爾轄。直抵濟隴。成德亦由聶拉木轉戰而入。凡賊所侵後藏地。悉復。六月庚子。遂入賊境。賊舉國來據於噶多溥。福康安分前隊為三。令海蘭察統之。又分前隊為二。福自統之。遣護軍統領台斐英阿。在木古拉山。與賊爭持。福康安由間道衝賊營。海蘭察又繞山出賊營後。與福相合勢。共克木城。石卡數十。追奔至雍雅。俘其頭人某。成德亦克鐵索橋。進至利底。福康安又檄諸神保亦至利底。以壯軍威。於是舉國洵懼。遣人乞降。福康安曰。是緩我兵也。弗可聽。嚴檄斥

之七月庚子。裹糧再進。歷噶勒拉堆補木特帕朗古橋甲爾古拉集木集等處七百餘里。凡六戰皆捷。所殺四千餘人。至熱索橋。福康安以為勢如破竹。旦夕可奏功。甚驕滿。擁肩輿。揮羽扇以戰。自比武侯也。我兵皆解囊韃。負火鎗以休息。賊乘間入。我兵狼狽而退。台斐英阿死之。武弁亦多陣亡者。賊復遣人乞和。福康安遂允其請。賊獻所掠金瓦寶器等物。令大頭人噶木第馬達特塔巴等。齎表恭進。馴象番馬及樂工一部。上鑒其誠。乃許受降。八月丁亥。班師。是役也。巴忠既辱國於前。福康安復僭師於後。猶賴夷人畏憚。為國家威德所懾。故爾獻表投誠以結其局。後之用兵絕域者。應引以為戒歟。

鑾儀衛

本朝鑾儀衛。相沿明錦衣衛之制。而不司緝探之事。掌衛者一人。其屬凡七所。左所掌輦輅。右所掌繖蓋儀刀弓矢。中所掌麾幡幢節鉞仗馬。前所掌扇拂鑪盒諸物。後所掌旗瓜吾仗。馴象所掌儀象騎駕。鹵簿鏡歌大樂。旗手衛掌金鉦鼓角諸物。設衛於刑部之次。其屬校尉輿隸等儀。猶相沿明制。凡冠軍使等官之任。拜印陞堂吏皂趨賀。悉如大部制。故其秩雖次領侍衛府。而威儀過之。鐘鼓司司譙漏城。北鐘鼓樓。

每夕委官及校尉直更。神武門鐘樓。凡上駐蹕圓明園。則每夕鳴鐘記更。漏上在宮日則已。午門鐘鼓。凡上祀郊廟受朝賀。則鳴鐘鼓以為則。其屬員。國初俱設漢員。後以滿洲侍衛間之。名曰鑾儀衛侍衛。雍正中釐正官階。改漢員為漢軍。滿洲侍衛亦改定冠軍雲麾等名。惟漢武科甲侍衛仍舊名。其後許外放綠營武弁。漢軍人員視為捷徑。每多諉託掌衛者。復有苞苴之納。故其風日頽。不可挽回。至今上親政初。大加整飭。復特簡大臣挑取其弊始革焉。

綠營虛銜

國初沿明制。綠營總兵官有勳勞者。遞加都督僉事都督同知右都督左都督諸名目。蓋明五軍府官也。其最優始加將軍之名。如趙良棟勇略將軍。潘育龍綏遠將軍。楊捷昭武將軍是也。至乾隆十八年。純皇帝厭其名近虛偽。乃皆裁革。定提督為從一品。官階始釐正焉。

綠營功加

八旗定制。凡從軍有功者。視其功之優次。與之功牌。分三等級。凱旋日。兵部計其級功。與之世職。綠營則有功加之目。凡臨陣奮勇者。與之功加一次。然核計功加二十

四次始敍一雲騎尉較之八旗功牌殊為屈抑。是以其世襲寥寥。武弁不肯用命。職由此也。近日純皇帝恩旨。將其陣亡人員一體與之世職。然功加之制尚未有奏及者。亦有司之責也。

偽皇孫事

庚子春。純皇帝南巡迴鑾時。駐蹕涿州。有僧人某率幼童接駕。云係履端王次子。以次妃妬嫉。故禳祿時將其逐出。僧人憐而收養。至於成立。初履端親王諱永瑛。純皇帝第四子。出繼履恭王後。其側福晉王氏。王素鍾愛。有他側室產次子。上已命名時王。隨上之灤陽。而次子以痘殤告。其邸人皆言為王氏所害。事秘莫能明也。上亦風聞其故。故疑童子近是。訊其嫡福晉伊爾根覺羅氏。嫡妃言其子殤時。余曾撫之以哭。並非為王氏所棄者。言之鑿鑿。上乃召童子入都。命軍機大臣會鞠。童子相貌端莊。頗敦重。坐軍機榻上。見諸相國。端坐不起。呼相名曰。坤來汝乃皇祖近臣。不可使天家骨肉有所湮沒也。諸大臣不敢置可否。保勵堂侍郎成時為軍機司員。乃傲然近前。批其頰曰。汝何處村童。為人所給。乃敢為此滅門計乎。童子惶懼。言係樹村人。劉姓。為僧人所教者。其讞乃定。時人以保有雋不疑之風。

事聞斬僧人於市。戍童子於伊犁。後又於其地冒稱皇孫。招搖愚民。為松相公筠所斬。然聞其邸太監楊姓者。云履王次子痘時。實未嘗殤。王氏暗以他屍易之。而命王之弄童。薩凌阿負出邸。棄之荒野。嫡妃所撫哭者非真也。然則僧人之教偽童。蓋亦有所憑藉。非無因而至者也。

和王預凶

和恭王諱

弘晝

憲皇帝之五子也。

純皇帝甚友愛。將

憲皇所遺雍邸舊貲全

賜之。王故甚富饒。性驕奢。嘗以微故。毆果毅公訥親於朝。上以孝聖憲皇后故。優容不問。舉朝憚之。最嗜弋腔曲文。將琵琶。荆釵諸舊曲。皆翻為弋調。演之。客皆掩耳厭聞。而王樂此不疲。又性喜喪儀。言人無百年不死者。奚必忌諱其事。未薨前。將所有喪禮儀。注皆自手訂。又自高坐庭際。像停棺式。命護衛作供飯。哭泣禮儀。王乃岸然飲啖。以為樂。又作諸紙器。為鼎彝盤盂諸物。設於几榻。以代古玩。余嘗覩其一紙盤。仿定窰式。而文綴過之。宛然如瓷物。亦一巧也。及王薨後。其子孫未及數年。相次淪謝。亦預凶之兆所感應也。

恒王置產

恒恪親王諱

弘暉

仁皇帝孫也。幼襲父爵。性嚴重儉樸。時

國家殷盛。諸藩邸皆

畜聲伎。恢園囿。惟王崇尚儒素。其俸棗除日用外。皆置買田產屋廬。歲收其利。人以吝嗇笑之。王曰。汝等何無遠慮。藩邸除俸棗田產外。無他貸取之所。不於有餘時積之。以待後人之儲。則子孫蕃衍時將何以為析產貲也。然諸邸以驕奢故。皆漸中落。致有不能舉炊者。而王之子孫富饒如故人。始識王之先見也。

安王好文學

安節郡王諱

瑪爾渾

安親王

岳樂

子也。少封世子。即好學。毛西河尤西堂諸前輩。皆

游燕其邸中。著有敦和堂集。又嘗選諸宗室王公詩。為宸萼集。行世。今杭大宗道古堂集中。載延接閣百詩。誤以為憲皇帝事。蓋憲皇居藩邸時。謹介持躬。育德春華。從不引見外人。見硃批諭旨。甚明。况御製集中。亦無贈閣百詩。詩蓋王曾受業於閣百。詩故於送終之禮。甚備。而俗呼安王邸為四王府。以致相沿訛傳為憲皇也。

德濟齋建園亭

德濟齋夫子嗣簡親王爵。時邸庫中存貯銀數萬兩。王見訖。謂其長史曰。此禍根也。

不可不急消耗之。無貽禍於後人也。因散給其邸中人若干兩。餘者建造別墅亭榭。軒然。故近日諸王邸中。以鄭王園亭為最優。蓋王時建造也。

紅蘭主人

紅蘭主人諱岳端。

安親王子。安節王弟也。善詩詞。崇德癸未時。饒餘王曾率兵伐明。南略地至海州而返。其邸中多文學之士。蓋即當時所延致者。安王因以命教其諸子弟。故康熙間宗室文風。以安邸為最盛。主人喜為西崑體。嘗延朱襄沈方舟等為上賓。方舟妻某。遲方舟久不歸。作杭州圖以寄之。當時傳為佳話。主人嘗選孟郊賈島詩。為寒瘦集以行世。以宗藩貴胄之尊。而慕尚二子之詩。亦可謂高曠矣。

果恭王之儉

果恭王諱弘瞻。

弘瞻。

憲皇帝第七子也。嗣果毅王後。善詩詞。幼受業於沈確士尚書。故

詞宗歸於正音。不為凡響。居家尚節儉。俸餉之積。至充棟宇。王每早披衣起。巡視各下屬。有不法者。立杖責之。故眾皆畏懼。無敢為非者。壬午夏。九州清晏。災。王後至。與諸皇子接見。談笑露齒。為純皇帝所窺見。會其門客有干請政事者。上乃褫王爵。降為貝勒。王乃閉門謝客。抑鬱生疾。上往撫視。王叩首衾裯間。惟謝過自

責而已。上感慟，嗚咽失聲。歸即加封親王。會以疾薨。上特謚曰恭。蓋取楚共王之意也。

武虛谷

武虛谷，億河南偃師人。中庚子進士。任山東博山縣縣令。有德聲。甲午秋，壽張王倫倡亂，為舒文襄公所撲滅。或傳倫實未死，潛匿於他方。庚戌間，山西人董二告王倫藏匿山西某縣。和相時專柄，欲希封賞，乃授意覺羅牧庵相公長麟，令其偵緝。牧庵拂其意，以虛妄對。和相艱然。其屬番役某欲獲和相歡心，因獻計，仍向齊省緝訪。或可得踪跡。和相乃密簽役往山東，至博山縣。其役恃和相勢，擅作威福。公擒至署中，取捕役簽票，視票惟書二公役名。而同夥行者凡十五人。公督責之。捕役抗橫無禮，公大怒，以大杖責數十。役歸告和相。和相怒曰：「縣令瘋耶？」乃敢杖吾胥役，乃授意於山東撫臣，以他事劾罷公職。公歸裝，惟書數十篋而已。嘉慶己未，有薦公於朝者。上命超雪復公職。而公已先時卒。士論惜之。

碓昂

嘉慶己未，上親政時，首下求言之詔。九卿臺諫等紛紛白簡言事。四方布衣之士

亦有上書於 乾清門以希進用者。然率皆急功近名之士。初無觥觥見事業者。惟
雖太守昂。以從九品末職。上書言教匪事。上以其言中肯綮。命乘傳從軍。太守即
短衣匹馬。從諸大帥後。隨同捕賊。以勇略見長於額。經略屢登薦牘。數年間置身司
馬。今任荊州太守。亦曠達士也。

梁提督

朝桂

少為黔中步卒。從征金川。時勒烏圍為賊壘之險峻處。兩次撻伐。皆阻

於其險。不能進攻。阿文成公圍之經年。未得進取。梁公奮然進曰。朝桂聞將恃鬥才。
不藉鬥力。今賊壘堅碉叢立。我兵仰而攻之。彼據建瓴之勢。下以擊我。人非木石。馬
能抵鎗礮之險。是殃民也。今不若覓他嶺嶂為賊所不守者。繞道以攻其後。可使賊
進退失險。我兵合以擊之。可收功于旦夕。此狄東美所以下崑崙關之故策也。阿文
成公奇其言。與之數百卒。立授叅將。劄付公。因率眾卒。草衣卉服。自叢嵐疊嶂間。以
刀掘路。士卒各懷一鐵釘。踵跡相接。攀釘而上。至夜半。抵賊壘。於營後攻之。賊以為
自天而降。倉卒奔竄。官兵仰攻其下。賊遂盡殲。後公游至廣西提督。臺灣時亦著勞
績云。

部胥役俞姓家。喪有失大臣之體。諸人為之降黜有差。純皇帝嘉其敢言。由御史立擢副憲。以旌其直。時張尚書以文學供奉。內庭嘗預樂部之事。公劾之。有張照以九卿之尊。親操戲鼓之語。張銜之次骨。乃譖公洩禁中語。下獄。上知其枉。立釋之。張恐其報復。因用其私人計。攜樽往賀。暗置毒酒中。因斃於獄。傅文忠時為戶部侍郎。大不服張所為。欲明言於朝。以公屍如常。事無左驗。乃已。踰年張病噎。告假旋里。卒於濟甯舟中。蓋見公為崇也。



清 汲修主人著

質王好音律

質恪郡王諱絲慶質莊王子也。幼聰敏。莊王督之甚嚴。初不解何所謂度曲者。與余交最密。自童壯時。即日相親。誼嘗勸余性之。下急。至於再三。至有衆叛親離之言。語雖激切。實中余之過失。又余有狠僕某。王默告余曰。其人多白眼。瞳子眊焉。非醜正者。余初不信其言。後果為其所賣。故余終身感王之德。王自辛酉夏始親音律。其後九宮譜調。無不諳習。較之深學者尤多別解。時有優童王月峯。髻齡穎俊。王每佳時令節。於漱潤齋紅牙檀板。使月峯侑酒而歌。王親為之操鼓。望之如神仙中人。體頗孱弱。後復有芮公虞之事。故抑鬱而終。年甫二十六。上悼惜之。特賜銀五千兩。以為賻焉。

成將軍

成將軍德。姓鈕。鈞祿氏。額直義公族孫也。幼從阿文成公征金川。頗多戰績。阿嘗曰。裨將中知兵者。惟成某一人而已。其後征廓爾喀。苗疆亦多戰績。後征楚中。教匪時。

總統為楚制府福甯。性暴悞。每失將士心。攻旗鼓營涼山諸賊匪。株守經年。無尺寸功。公隨其軍。心甚抑鬱。其戚某往探公。公設酒待之。將飲。公笑曰。席上無可歡者。可
以數賊匪之心肺。侑酒。因下令出戰。公結裝去。聞火鎗聲。須臾擒數十賊歸。酒尚未
寒也。公因掀髯浩歎曰。若此草竊。較之金川番匪。實十不當其一。二何難滅。此朝食。
而當軸輒以養賊自重。真不解其何心。老夫此生功名。終於此矣。因潛然淚下。不踰
年。公以疾告歸。頤養林泉者數載。然後終。其子提督穆克登。額亦勇猛。有父風。累破
賊匪。賊人畏之如虎。後殉節於川中。上甚悼惜。特賜世襲一等男以旌之。

洪稚存

洪稚存。編修亮吉。陽湖人。中庚戌探花。性狂妄。嗜酒縱飲。善攷訂。其著乾隆中府廳
圖誌。及東晉疆域考。南北朝疆域考。學問淵博。戊午大考。翰林公上平邪教疏。深中
當時竅要。人爭誦之。朱文正公招之入都。欲薦於朝。先生乃於朱座。首斥其崇信
釋道為邪教首領之語。朱正色曰。吾為君之師輩。乃敢搪突若爾。先生曰。此正所以
報師尊也。又譏王韓城相公為剛愎自用。劉文清公為當場鮑老。一時八座。無不被
其譏者。後裹裝欲歸。復上書於成王及朱石君劉雲房二相公。多誹謗。朝廷語成

王以其書上聞。上憫其書生迂魯。成於伊犁。未踰年。即放歸田里。以其書常置御座旁。曰。此坐右良箴也。上之寬大也若此。先生既放還。亦縱酒自娛。不數載卒於家。其所著古文多載。本朝名臣嘉言善行。有裨於世教焉。

伊將軍

伊將軍 勒圖 少貧窶。幾不能舉餐。充侍衛。嘗代人持豹尾鎗。以食其賃。皆人爭賤之。從征西域有功。阿文成公嘗與論伊犁疆域。公言其要隘某某處。如聚米為山狀。阿文成異其人。及歸。即薦公代其任。公撫絕域。先後二十餘年。駕馭得宜。撫卹番夷。輒以至誠。忱其天良。番夷感激用命。外藩如安集延。哈薩克等處。皆畏威懷德。至呼為父。公性廉潔。饋羊至十數。即不收取。而賞賚倍優渥。又定開屯田。練士卒。犒夷眾。諸制。至今遵之。純皇帝喜其守邊甯謐。嘗賜詩。比之趙充國。班定遠焉。後卒於任。番夷悲慟。至有剪面文身者。上悼惜之。封其子為一等伯。以旌之。

錢文敏

錢文敏公 維城 中乾隆乙丑狀元。選為清書翰林。公性聰敏。以國書為易學。遂不復用心。至散館。日輒曳白。純皇帝大怒。曰。錢維城以國語為不足學耶。乃敢

抗違定制。若此。將置於法。傳文忠公代請曰。錢某漢文優長。尚可寬貸。上召至階下。立命題考之。公倚礎石。揮毫未踰刻。輒就。上異其才。命南書房供奉。後遂游陞至戶部侍郎。寵眷甚渥云。

阿司寇

覺羅少司寇

阿永阿

以筆帖式起家。任刑部侍郎。性聰敏。善詞曲。嘗定秋審冊。公揚

筆曰。此可謂筆尖兒。立掃千人命也。

納蘭皇后以病廢。公欲力諫。以有老親在堂。

難之。其母識其意。喟然曰。汝為

天家貴胄。今欲進諫。

當亡。乃以親老之故。以違

汝忠蓋之志耶。可舍我以伸其志也。公涕泣從命。因置酒別母。侃然上疏。純皇帝

大怒曰。阿某宗戚近臣。乃敢蹈漢人惡習。以博一己之名耶。特召九卿諭之。陳文恭

公曰。此若於臣宅室中。亦無可奈何事。託冢宰

庸曰。

帝后即臣等之父母。父母失

和。為人子者。何忍於其中。辨是非也。錢司寇

汝誠曰。

阿永阿有母在堂。盡忠不能盡

孝也。

上斥之曰。錢陳羣老病居家。汝為獨子。何不歸家盡孝也。錢叩謝。

上乃成

公於黑龍江。命錢司寇歸終養焉。踰年。

后既崩。御史李玉明復上疏。請行三年喪

禮。亦成於伊犁。二公先後卒於邊。未果赦歸也。

孫文定公

孫文定公

嘉淦

字懿齋。太原縣人。公父以俠聞。殺人。公年十七。與其兄日行三百里。

出奇計。脫父於獄中。康熙癸巳進士。雍正元年。公以檢討上封事三。曰：親骨肉。停捐。

納罷西兵。憲皇帝壯之。立召對。授國子監司業。累遷吏部侍郎。仍兼祭酒事。薦教。

習某。憲皇帝不用。公爭益堅。上擲筆與之曰：汝書保狀來。公持筆欲下。大學士。

某呵之曰：汝敢動。上筆耶。公方悟。捧筆叩頭。上大怒。反縛置獄。擬斬。已而謂大。

學士曰：孫嘉淦太戇。然不愛錢。可銀庫行走。公出獄。不抵家。逕趨庫所。果殺親王疑。

公故大臣。黜必慊於懷。不屑會計事。又聞蜚言。謂公沽名。收銀有縮無盈。乃出不意。

突至庫視公。公方持衡。僂稱量。與吏卒雜坐。勞苦均共。問所收銀有不足乎。公曰。

某所收別置一所。請覆之。王辜權良久。無絲毫盈絀。如衡而止。王大奇之。即為轉奏。

上亦愈信公。命署河東鹽院。純皇帝元年。擢左都御史。上三習一弊。疏大旨。以。

為人君耳。習於所聞。則喜諛而惡直。目習於所見。則喜柔而惡剛。心習於所是。則喜。

從而惡違。自是之根不拔。則機伏於微。而勢成於不可返。黑白可以變色。東西可以。

易位。臣願皇上時時事事。常存不敢自是之心。引文王望道如未之見。孔子可以。

無大過為喻。上嘉納之。一時傳誦焉。後督直隸。以近畿土地皆為八旗勳舊所圈。

民無恒產。皆仰賴租種旗地以為生。而旗人自恃勢要。增租直。屢更佃戶。使民無以

聊生。因建旗地不許增租奪佃。有才民故為抗欠者。許許之官。官代為徵收。解旗分

領。至今旗民賴以相安無事。後以訊謝侍御濟世事不實。免官。傳文忠秉政後。力薦

於朝。召補副都御史。尋遷吏部尚書協辦大學士。傳文忠嘗延公會食。公往謁其

邸。未入座。遽趨出。傳怪問之。公曰。某處設反坫。某處建螭頭閱閣。皆王邸制度。公不

宜居此。嘉淦將速歸。繕疏劾之也。傳公長跽。請立改其制。公乃入席。歡飲終日。其嚴

直也。若此。公內峻外和。相對者。如登泰華。坐春風。非不陽和熙熙。恥在顏間。而業已

置人於青雲上。雖有下界諉誣語。不特不敢出於口。亦并不能生于心。好靜坐。退食

之餘。一經相對。公既負直聲。屢躡屢起。晚年物望愈隆。朝中略有建白。天下人咸曰。

得非孫公耶。遂有匪人偽奏疏一紙。語甚悖。託公所為。窮治經年。始得主名。天子

知公忠。無他腸。寵遇益隆。而公終不自安。以為舍他人而我假。必其致之者有自。

遂自此食不甘。寢不寐。情懷忽忽。一切所以補塞晏參密勿者。彌口不宣。即家庭間。

亦寂然無復知者。薨時。上甚悼。謚文定。今上即位。念其忠梗。詔廢其孫變為

員外郎以旌其直云。

尹文端公

尹文端公繼善字元長。姓章佳氏。世居盛京。其父文恪公泰罷祭酒家居。憲皇

居藩邸時。命祭三陵。天會雨。因宿於公家。與文恪公語。奇之。問有子仕乎。曰第

五子。舉京兆。曰當令我見。及公試禮部。將謁雍邸。而憲皇已踐祚。乃中止。公亦登

雍正元年進士。引見。上喜曰。汝即尹泰子耶。果大器也。選入翰林。未踰年。即授

廣東按察使。甫抵任。遷副總河。未半年。遷江蘇巡撫。去釋褐甫六載耳。公白皙少鬚

眉。豐頤大口。聲清揚遠聞。著體紅癡如硃砂鮮。目秀而慈。長寸許。年三十餘。即任封

疆。遇事鏡燭犀利。八面瑩澈。而和顏接物。雖素不善者。亦必寒暄周旋之。其督南河

也。上命開天然壩。公不可。適浙督李敏達衛入。覲過清江。傳旨嚴飭。且云

衛已奏明。黃水小開固毋妨。公覆奏。李衛不問河身之深淺。而但問河水之大小。非

知河者也。倘河淺壩開。宣流太過。則湖水弱。難以敵黃之強。方草奏時。幕中客齊為

公危。有治裝求去者。公不為動。憲皇帝喜曰。卿有定見。朕復何憂。輟御衣冠

賜公。而加公太子太保。純皇帝登極。公屢任中外。先後督兩江幾三十年。民相與

壬申舉京兆補中書入軍機房傳文忠公倚為左右手屢遷州郡以廉直稱公風骨秀整靜氣迎人雖恂恂謙謹造次必於儒者而臨大事則屹不可動甲午壽張王倫作亂距運河甚近人情洶洶有欲閉城者公不可曰寇未至先閉城門是示之怯也且鄉民爭入城何忍棄之乃募鄉兵拒守而身坐城闔彈壓稽察賊知濟南有備乃不敢南向已而官兵奏捷一城雞犬不驚焉後屢遷至湖南巡撫公事母孝初選守大理府再遷甘肅監司俱以親老調近省撫楚時見屬吏有篤老親猶來赴補惻然憫之奏官員凡親年七十雖有次丁俱許終養一時中外人歸養者千餘人臨終前一月猶奏湖南社倉穀業已敷用其息穀請免征收奉旨允行批到日方伯秦承恩捧劄子啟告樞前慰公泉下愛民之心時公已歿二十餘日矣公所著切問齋叢書皆選本朝諸名臣奏疏見諸施行者各分門類其註疏尤詳備為後世之繩墨焉。

徐中丞

徐中丞諱士林山東文登人父農也公幼聞鄰兒讀書聲樂之跪太母前曰願送兒置村塾中許之遂中康熙癸巳進士累遷至福建汀漳道漳俗鬥殺人捕之輒聚眾

據山。或請用兵。公曰無庸。命壯士分扼要隘三日。度其食且盡。遣人深入。恍以好語曰。垂手出山者免。如其言。果遂對出。乃伏其仇於傍。仇大呼曰。為首者某也。立擒以徇。眾驚散。嗣後捕犯。犯無據山者。遷江蘇布政使。丁父憂。詔奪情不起。服闋入都。純皇帝問山東直隸麥何如。曰。旱且萎。問得雨如何。曰。雖雨無益。問何以用人。曰。工獻納者雖敏。非才。昧是非者雖廉。實蠹。上深然之。尋遷江蘇巡撫。公於要路不通一刺。而於鄉會師門。惓惓不忘。曰。此人生遇合之始也。治獄如神。有宿松民孀田氏。事姑孝。兄某利其產。逼嫁之。與羣匪篡焉。婦刎於途。誣以墜水。公坐堂上。見黑衣女子啾啾如有訴。召兄某質之。則毛髮析洒。口吐實情。公深愧。以鬼道設教。而滿庭胥吏皆有見聞。不能掩也。凡獄決憲於轅垣。絕人影射。守令來謁。命判試其才。教曰。深文傷和。姑息養奸。戒之哉。夫律例猶醫書本草也。不善用藥者殺人。不善用律者亦如之。性廉信而絕不自矜。嘗賀長至節。天寒裘禿。按察使包括以貂假公。公披之如忘。涕唾交揮。家人耳語曰。此包公衣也。公大慚。謝過。少頃論公事快。揮洒如故。聽訟飢家人供角黍。且判且啖。少頃髭頰盡赤。蓋悞殊為飴糖。筆筋交下。不能復辨也。晚坐白木榻。一燈熒熒。然手披目覽。雖除夕元辰。勿輟。幕下客憐之。治具邀公。公猛

噉不問是何膳飲其平素精神寤寐偃仰唾涕知愛民憂國惟日不足而已故於服食居處人以是供公以是受不容心於豐亦不容心於儉也撫吳未踰年以疾乞歸養舟次於淮安卒其遺疏云願皇上除弊政毋示紛更廣視聽而中有獨斷愛民勿使之驕用人先求其直章上人以此朱文端公云上悼惜賜祀賢良祠年五十八

裴文達公

裴文達公諱曰修字叔度江西新建人乾隆元年以廩生薦博學鴻詞四年中進士大考翰林名最高遷侍讀學士任九卿者三十餘年公貌清整眉有濃翠顧盼間精神淵映居恒喜賓客工諧謔搜奇語怪了無倦色而遇事神解超釋每詣一曹受一職手文書嘿然數日後判決如流二十一年王師征伊犁公面奏軍務機宜純皇帝大悅以其才似舒文襄即賜御衣冠乘傳至巴里坤傳宣聖意會逆酋莽阿里克遣其弟詭稱押送諸番探信卡倫公與哈密鎮臣祖雲龍縛畀總督發其奸哈密兵少有赴巴里坤種地者七百人公請暫留為衛撥沙洲五衛麥石添備支放其剩餘者公散各塘路站平糶之上皆獎許公以一書生冒矢石行萬里外與陝

甘督撫滿洲諸將軍。計議密勿。而能下協邊情。上符 睿算。近代儒臣所未有也。公聽視機警。受大任。舉重若輕。上愛其才敏。倚若股肱。凡有事于四方。與大學士劉文正公。先後奔走。前命未復。後命又至。半途回車。竭竭東西。雖侍 內庭。領六部。而英蕩款關。足跡常遍天下。公所讞決。無苛嚴。亦無縱捨。尤善治水。常奏治水。當先審其受病之由。再論治病之法。就一縣一府而言。病有其處。合一省而言。則不然。就一省言。病有其處。合數省而言。又不然。若僅於一處受病處治之。而下流之去路未清。則為患滋甚。上深然之。所治黃淮。泲濟。伊洛。沁汜等共九十三河。疏排濬淪。貫穿原委。俱有成效。可為後法。凡遇政事。諸大臣或探 聖意。喋斷不前。而公獨抗聲。有犯無隱。上鑒其誠。雖忤 旨。時加嚴訓。不逾時 恩禮如初。亦與舒文襄公相似。年六十二病噎。上賦詩存問。醫藥不絕於道。加太子少傅。薨時。賜謚文達。入賢良祠。

傅閣峯尚書

傅閣峯諱 鼎。號爽齋。姓富察氏。世以武畧起家。公眉目英朗。倨身而揚聲。精騎射。讀書目下數行。年十六侍 憲皇帝於藩邸。駉乘持蓋。不頃刻離。雍正元年。補兵部右

侍郎年大將軍。以驕汰誅窮其黨。公謂廷臣曰。元惡已誅。脇從罔治。冀侍上久能知上之用心。倘諸公心知其寃而不言。非上意也。諸王大臣以公言。平反無算。隆科多以罪誅。公言其子岳興阿無罪。上疑公與隆有交。故為岳地。謫戍黑龍江。公聞命。負一篋步往。率家僮。斧薪自炊。先是公在。上前嘗諭準噶爾形勢。上不以為然。用兵數年。所言驗。乃召公還。予侍郎銜。上違和。醫藥皆公掌之。十年春。命公監大學士馬爾賽軍。會賊為超勇襄親王敗於光顯寺。事見後卷由拜達理迺。公請於馬曰。賊敗亡之餘。可唾手取也。冀遠來。雖馬疲猶能一戰。願大將軍給輕騎數千。助冀事成。歸功將軍。事敗。冀受其罪。馬嘿然不出師。再三言不應。公長跽以請。馬戚副帥李杅曰。違將令者可斬也。公憤激。自率兵開城門出。而賊已先時遁。以馬病不能窮追。事聞。上大悅。賜孔雀翎。移佐平良郡王軍。斬馬爾賽狗於軍。會賊有求降意。而盈廷諸臣皆欲遣使議和罷兵。上問公。公叩首曰。此社稷之福也。上意遂定。即命公同都統羅密侍郎阿克敦往。時戰爭連年。虜氛甚惡。窮沙萬里。雪沒馬鼻。行人迷路。認人畜白骨而行。公聞命。不辦巖徑。上馬馳抵策零部落。噶爾丹策零坐穹廬。紅氍毹為褥。金龍盤疊高五尺。侍者貂蟬持兵。女樂數行。彈琵琶獻酒。公從容

宣詔音響如鐘。賊酋伏地觀者以萬計。皆膜手指。夷言曰：果然中國。大皇帝使臣好狀貌也。詔劃阿爾泰山為界。策凌曰：阿爾泰山不毛之地。中國奚用。且我先人披荆棘厲血刃。與喀爾喀爭來之地。甯忍棄之。公曰：以為若不念先人耶。若肯念先人。至善。昔我聖祖征噶爾丹。通好爾國。爾國主伐叛助順。縛噶爾丹來獻。在途病死。爾國震於天威。即獻阿爾泰山地方。中國受之。置驛設守有年矣。今猶有是言。是非背。大皇帝乃是背其先人。豈非大不祥乎。策凌語塞。思以利害動公。乃集十四鄂托。十四宰桑。合而見公。曰：議不成。公不歸矣。公叱曰：出嘉峪關而思歸者。庸奴也。某思歸。某不來矣。今日之議事集。萬世和好。不集。三軍暴骨。一言可決。而譏譏如兒女子。吾為爾王羞也。諸首相目以退。翌日。策凌如約繕表。求公轉奏。并遣宰桑同來獻橐駝明珠等物。和議乃定。純皇帝即位。遷刑部尚書。以事免。公寬於接下。太雜剛於事上。太驚。仇爽自喜。好聲矜賢。簡節而疎目。故每櫻其禍焉。果殺親王任事時。警效所及。九卿唯唯。公在坐伺。王發聲。聽未畢。輒拒曰：王誤矣。王不能堪。憲皇帝責公曰：汝知果親王何語。而又誤耶。公亦不能答也。

顧總河瑤。姓伊爾根覺羅氏。太傅公八代子也。太傅為憲皇帝授經師。故憲皇帝厚待其家。公以廕起家。乾隆中。累遷至河東總河。公性梗直。好宋儒書。每日恒置一編相對。燈火熒熒。如課讀諸生也。所期高遠。以古名臣自命。每大事。侃侃正論。不避利害。人以鐵牛呼之。鄂文端曰。是真為鐵漢也。果於友誼。公之督河時。前督完顏偉病於署中。家屬已先行。公為之守護湯藥。旬日無倦。完顏公謝之。公曰。吾輩共事。君父即與昆仲無異。安有兄病而弟不為之經理者乎。况公家屬已去。今無親者在傍。琮敢不黽勉從事乎。完顏公感激垂涕曰。弟來生補報之可也。後完顏公卒於署。公即董其喪事。含殮從厚。人爭稱之。所統河上兵卒。教以兵法技藝。皆獍捷英俊。少年嘗與李敏達公遇。李素以知兵自負。其親隨皆關西壯偉之士。笑謂公曰。若此脆薄之物。何以禦敵。公笑曰。狄武襄以少俊為西夏所輕。故製滲金具戴以接戰。恒多奇捷。如用吾部下兵。可效狄公之法可也。因命與敏達公部下兵角觝。李兵將應聲而倒。公大笑。李慚而謝。其知兵也如此。

宋總兵

宋總兵

元俊

字甸芳。江南鳳縣人。以武進士任四川城守營守備。遷阜和營游擊。乾

隆三十六年夏。金川酋索諾木襲殺革布土司。其黨小金川酋僧格桑亦發兵侵明正土司。據斑斕山阻官兵進路。被害者相繼告急。總督阿爾泰知公素得夷心。命抵賊巢責問原委。至刮耳崖。索諾木迎謁。詭以革番內變為詞。公知其詐。歸告阿公曰。兩首角觝為奸。雖陽順而陰怙惡。非一大創不可。如興師當先取小金川。即獻三路進兵之策。一從斑斕山直探小金川門戶。一從堯磧截取甲達金山梁。救達圍而趨美諾。一繞小金川尾閭。由約查進攻遜克宗。阿公以其計奏聞。上命副將軍溫福提督董天弼分路進兵。總督阿爾泰駐劄後路。居中控制。當是時。蜀中救甯日久。文武恬熙。一旦軍興。相顧喑嘆。兩金川地勢奇險。碉卡柴立。兵將未言色沮。公獨能聚米借籌。歷歷指畫。於是將軍運糧出戰。一切惟公是詢。公探知小金川所佔明正之達嶺山梁。與巴底巴旺相連。密令參將薛琮挾巴酋暗擊山梁。而自統兵從甲楚渡河攻之。賊腹背受敵。大驚奔潰。收復納頂碉寨百餘。即用納頂土百戶為前導。直搗約咱。賊愈困。聞大兵至。即走遁。時提督董天弼破甲金寨。副將軍溫福收復斑斕山。再克卡了。上大喜。擢松潘總兵。賞花翎。時三十七年正月十日也。計剿小金川未及五月。而侵地全收。聖諭褒美。公益感激。將直搗賊巢。旋奉將軍命。調回籌辦什

咱事宜受代而行。方攻奪河東時。小金川求救於索諾木。索諾木將襲我後路。公得巴首密報。遣使至刮耳崖。責問之。索諾木知情得。撤回原兵於要隘處。增碉固守。公請於制府曰。大金川逆形已露。不可不誅。然犯險強攻。徒傷士卒。不如即用革布逃首。其人有報仇雪恥之心。尤悉形勢。可使也。遂密遣番酋乘夜踰山。約諸酋連結各寨為內應。而自率游擊吳錦江等。由節木郭渡河。據勺藏橋。舉礮為號。革番從內突出。與官兵合力夾攻。斬千餘人。進圍丹東角洛。收復革境三百餘里。事聞。上愈嘉獎。賜荷包寵異之。先是公別遣守備陳定國。潛約綽斯甲布土司。屯兵甲爾壠壩上。聽候調遣。人莫知其意。及革境全平。金川酋畏綽土司之躡其後。不敢傾巢出戰。大兵雖在東南。而制勝在西北。甲爾壠壩上。雖按兵不動。而金革兩處已阨咽喉。公算略深沉。皆諸將所莫及。時上意大兵乘勝。即可擒取索諾木。而公言兵少未可輕進。為制府桂林所劾。調回大營。隨即革職。公長身嶽立。音響如鐘。髯尺許。望而知為偉人。料敵審勢。毫忽不爽。初收復革番。所用兵不過千計。及進攻金川。公建議北路。必需三萬人。當事者疑公怯。不聽所請。卒無成功。後副將軍明亮廣集漢土兵三萬人。先通路。後進兵。其言始驗。公待士信。用法嚴。與叅將薛琮交最厚。攻小金川時。制

府重公。命以游擊領兵。節制諸將。公磨利刃與薛約曰。某地某日會。我後至。君斬我。及公至所期處。而薛逾二刻始來。公遣飛騎持刀呼取薛參將頭。薛望見笑曰。薛頭與賊不與公也。奮前奪數礮。反公猶手縛之。見制府。以功論贖。乃已。先是馭番者。平時視若草芥。及蠢動。又畏如虎。國家所賞繒帛。易以竄濫。首叩首領去。歸視大志。笑擲於路。公有賞。必佳物。其人輒喜相告。或舁公抵其巢。率子若女。環視左右。公賜以茶煙簪珥。兒子畜之。小不循法。立加笞呵。悚息聽命。打箭爐邊關以外官將行李。俱畏夾壩出沒。惟公與果齊盛太守之箱篋。蠻夫爭為背負。或遺於路。必擊送行帳。諸番小有動靜。先來告公。以故凡所料判。動合機宜。是以所向有功。後川督林桂擁兵不戰。又私以銀與番夷。歸贖潰兵。為番夷所姍笑。公與前督阿爾泰。連名劾之。上持疏曰。阿封疆老臣。所言必不悞。桂林乃負恩若此。法不可貸。時有袒桂者。乃曰。元俊介胄小臣。乃敢於連名者。恐阿為宋所紿。上惑其言。使某貴臣勸之。貴臣左袒桂林。因劾公狂藐狀。公抑鬱而死。死之日。番夷剪面環哭。聲振巖野。平居以忠義自許。思立功名。然性剛。能恤下。不能事上。偶有議論。慷慨迅厲。傍若無人。以致讒忌者眾。身後籍沒。兩子戍邊。有張芝元者。以走卒隸公麾下。拔參將。四十一年春。大將

軍阿文成公。平定金川凱旋時。芝元書公戰狀。抱一冊哭陳轅門。阿公代為之奏聞。邀恩赦其子歸。人莫不嘆張之能報德。公能知人也。

馬僧

江甯嚴星標。常熟徐芝仙。皆以耆士。在大將軍年。羹堯幕府。雍正元年。青海羅卜藏丹津不順。憲皇帝命年為撫遠大將軍。岳鍾琪為奮威將軍。率兵討之。功成。年亦驕抗。二生恐為所累。以年衰辭歸。年厚贈金幣送還。宿蒲州。有兩騎客來。狀虓猛。所肩行李擔鐵也。天明行。晚復來宿。心悸之。卒無如何。又客館逢二僧。皆獯黠少年。二叟目之一僧。吳語曰。誰無眷屬。何看為。始知其一為尼。急亂以他語出。不敢按站。行十餘里。即宿。僧來排闥。踞上坐。揚其目而視之曰。我疑若書生也。乃亦盜耶。橐內赤金二千。從何來。二叟駭曰。天下財必為盜而後得耶。朋友贈何妨。僧曰。若然。二君必年大將軍客也。曰。然。曰。幾殺好人。起挾女尼走東廂。酌酒飲倚而歌。聽之。秦聲也。抵暮。兩騎客亦來。解鞍宿西舍。庭月大明。二叟閉門卧。僧獨步簷外。嘖嘖曰。好馬好馬。亡何。兩騎客去。僧闐然叩門。嚴窘。挺身出曰。事至此。尚何言。行李頭顱。都可將去。但有所請於和尚。指芝仙曰。此吾老友。七十無兒。殺之耶。釋之耶。僧笑曰。我不殺汝。先

去之兩騎客乃殺汝者也。詰其故曰：凡綠林豪測客囊，皆視馬蹄塵。金銀銅分量，望塵了然。兩盜雛耳，雖相伺而眼眯，誤亦金為錢鏹，故不直一下手。然非我在此，二君殆矣。問僧何來，曰：余亦從年大將軍處來也。公等知將軍平青海，是誰助之功耶？余故吳人，少無賴，好勇，被仇誣作太湖盜，不得已逃塞外，隨蒙古健兒盜馬，久性遂愛馬。亡何見岳公鍾琪所乘彪彪然名馬也，夜跳匿廐中，將牽其韁，未三鼓，公起視，自飼馬。四家僮秉燈至，余不能隱，被擒。公上下視，問行刺者乎？盜馬者乎？曰：盜馬，問白日闌入者，夜踰牆者乎？曰：踰牆，公微瞋，若有所思，秣馬訖，命隨入室，案上酒榖橫列，公飲巨觥，而以一盞見賜，隨解衣卧。大鼾，遲明，公起盥沐畢，喚盜馬人同往大將軍府。公先入，良久，聞軍門傳呼曰：岳將軍從者某，賞守備銜，効力轅下。岳旋出，上馬，顧曰：壯士努力，將相甯有種耶？亡何，余醉與材官角鬥，將軍怒，賜杖，甫解袴，岳公至，曰：我將征西藏，為汝乞免，汝從我行。時雍正二年二月八日也。公命副都統達鼐、西甯總兵黃喜林各領兵先，自領五百人為一隊，約某日會於青海界之日月山。至期天暮，公立營門，諭二將曰：此行非征西藏也，青海酋羅卜藏久稽天誅，昨其母與其弟紅台吉二酋密函乞降，機不可失，手珠寶一囊，金二餅，顧余曰：先遣汝召賊母來，賊

所駐穹廬外有網城結金鈴於上。動輒人知。非善踰者不能入。賊營帳四上有三紅燈者。其母也。對面帳居羅卜藏。左右居丹津紅台吉二酋。珠寶與金將以為犒。此大事。汝好為之。解腰下佩刀授余。余受命叩頭出。公起身入天大霧。余乘霧行三十餘里。至賊網城。果如公言。余騰身而入。果帳燭熒然。母上座。二酋侍側。母六十許。面方髮微白。披紅錦織金袍。叱余何人。余曰。年大將軍以阿娘解事。識順逆。故遣奴來問好。囊寶貝奉贈。金二餅。餽兩台吉。二人聞之喜。叩頭謝。余知功將成。詐曰。將軍在三十里外待阿娘。阿娘速往。三人相顧猶豫。余解佩刀插其座。厲聲曰。去則去。不去我復將軍。其母曰。好蠻子。行矣。上馬與二酋。隨十餘騎。行不十里。岳公迎來。將其母與二酋。交達黃二將分領之。須臾前山火光起。夾道礮發。斬母與二酋。回入軍營。次日。謀者來報。羅卜藏丹津已逃。準噶爾部落。岳公命竿三頭。狗三十三家。台吉皆震悚乞降。二十二日。至年大將軍營。往返纔十五日。三月朔。凱旋。岳公首舉余功。大將軍賞游擊銜。余詣軍門謝。岳曰。某杖此僅半月耳。大丈夫何顏復來。願辭公歸。別圖所報。公笑曰。咄。吾知汝終為白首賊也。厚賜而別。歸次涇州。宿回山王母宮。昵妓女金環。年餘。資用蕩盡。不能歸。憶幼時習少林寺手搏法。彼處可棲。遂與金環同削髮。

赴中州。苦無馬。逢兩盜騎善馬。故奪之。二叟不信。曰：彼不受奪。奈何？僧笑拉二叟出視。廡則夜間已將所肩鐵擔屈而圓之。束二馬首於內。不可開。二盜氣奪。故遁去。言畢。挾女尼舒其擔。牽馬門外。拱手作別。曰：二君有戒心。勿北行。可南去。凡李衛田文鏡兩總督所轄地方。毋憂也。後三十餘年。二叟亡。嚴之孫用晦。過河南登封縣。遇少林僧論拳法。曰：雍正中。異僧來傳技。尤精。然無姓名。好養馬。因稱馬和尚。後總督田文鏡禁嚴。僧轉授永泰寺環師。今環師亦亡。其徒惠來者。能傳其術。用晦心知馬和尚。即此僧。環師者。金環妓也。欲訪惠來。以二寺相距十餘里。天大雪。不果往。

王公降襲次第

國初開創遼瀋。凡宗臣貴位。統名貝勒。崇德元年。定親王、郡王、貝勒、貝子、鎮國輔國二公。皆冠寶石頂。以補服翎眼為差次。統名曰入八分王公。蓋即加九錫之意也。其未入八分公。以及鎮國輔國將軍。皆冠珊瑚頂。奉國將軍。視武臣正三品。奉恩將軍。視武職正四品。秩皆與流官同。舊例親王嫡子封郡王。郡王以下嫡子。皆遞降一等。封親王。眾子封輔國公。親王庶子封輔國將軍。郡王以下遞降同。故安王諸子皆封。僖勤諸郡王。蓋沿明制也。康熙中。以宗祿繁重。乃改親王。無論嫡子眾子皆封。未入

八分輔國公郡王以下。遞為減等。而考以譜譯馬步射。其伎皆優等。然後授以本職。否則遞相降等授爵。其親郡王。皆世襲罔替。貝勒以下。皆降襲。至輔國公。然後世襲。而輔國公又無復降襲之例。其未入八分輔國以下。皆降至奉恩將軍。世襲罔替。而無論軍功恩封。皆一例辦理。故杜度彰泰諸貝勒。有開創大功者。亦皆一體降襲。未免無所區別。純皇帝篤念宗親。故特分定軍功恩封之例。其有勳勞者。無論王貝勒。皆世襲罔替。其恩封者。親王遞降至鎮國公。郡王遞降至輔國公。貝勒遞降至未入八分鎮國公。貝子遞降為未入八分輔國公。鎮國公遞降至鎮國將軍。輔國公遞降至輔國將軍。皆世襲罔替。然後宗爵始釐正焉。

王府官員制度

定制親王長史一員。頭等護衛六員。二等護衛六員。三等護衛八員。四五六品典儀各二員。牧長二員。典膳一員。管領四員。司庫二員。司匠司牧六員。世子減二三等護衛各二員。餘如故。郡王減二等護衛二員。三等護衛三員。四品典儀二員。牧長一員。衛各二員。餘如故。長子減頭等護衛三員。餘如故。貝勒減頭等護衛四員。而增設司典膳一員。餘如故。長子減頭等護衛三員。餘如故。貝勒減頭等護衛四員。而增設司儀長一員。二等護衛二員。減五品典儀一員。司牧司匠等皆裁減焉。貝子減二等護

衛六員。而增設三等護衛一員。減六品典儀二員。而增設七品典儀二員。八品典儀二員。鎮國公等。減三等護衛二員。餘如故。其包衣叅佐領親軍校。護軍校。包衣驍騎校。皆視其佐領親軍馬甲之多寡。以遞設之。惟怡賢親王。以贊襄世廟。莊恪親王。以輔翌高宗。封雙親王。其護衛皆倍增之。嘉慶初。上諭儀成二王。皆增設頭二三等護衛各二員。定親王慶郡王。皆增設頭等護衛一員。二三等護衛各二員。蓋俱曠典。非定制也。

宗室小考

乾隆中。上嘗召見宗室公寧盛額。不能以國語應對。上以清語為國家根本。而宗室貴胄。至有不能語者。風俗攸關甚重。因增應封宗室及近支宗室十歲以上者之小考。於十月中。欽派皇子王公軍機大臣等。親為考試。清語弓馬而先命皇子較射。以為諸宗室所導式。諸宗室視其父之爵。列次考試。其優者帶領引見。上每賜花翎緞疋以獎勵之。其劣者。停其應封之爵。以恥之。故諸宗室無不諳習弓馬。清語。以備維城之選焉。

宗室婚嫁

乾隆中。純皇帝篤念宗室貧乏。以致失產無以自活。因命宗人府堂官詳為撫卹。分以等第。其最貧者。賞銀三百兩。其次者。半之。命其回贖田產以資生理。又念其婚喪事件無所瞻仰。故特命王公中賜其行輩最尊者。命司宗室紅白事件。遇有婚嫁者。特賜銀一百二十兩。死喪者。特賜銀二百兩。以為粧賻之費。實體恤天潢無所不至。而近日宗室中每有不循正軌。至屢煩聖諭教斥者。真罔有知識之人也。

宗室任職官

國初宗臣皆係王公世蔭。無有任職官者。康熙中。仁皇帝念宗室蕃衍。初無入仕之途。乃欽定侍衛九十人。皆命宗室挑補。雍正中。裁汰宗人府滿洲司員筆帖式之半。皆命宗室人員充補。乾隆中。又設宗室御史四員。以為司員陞擢之階。嘉慶己未。今上親政。特設宗室文繙譯鄉會試諸科目。又於六部理藩院增設宗室司員若干員。以為定額。然後宗室入仕之途。視為廣裕。而亦皆鼓勵以思自振也。

于文襄之敏

乾隆初。軍機大臣。入參密勿。出覽奏章。無不屏除奔競。廉直自矢。如果毅公訥親。其

人雖谿刻不近人情。而其門庭闐然。可張羅雀。其他人可知矣。惟汪文端公由敦愛惜文才。延接後進。為世所訾議。然所拔取者皆寒畯之士。初亦苞苴之議者。于文襄敏中承其衣鉢。入調金鼎。初尚矯廉能以蒙上眷。繼則庶吏頗有簞簞不飭之議。再當時傳文忠劉文正諸公相繼謝事。秉鈞軸者惟公一人。故風氣為之一變。其後和相繼之。政府之事益壞。皆由公一人作俑。識者譏之。公才頗敏捷。非人之所能及。其初御製詩文。皆無煩定稿本。上朗誦後。公為之起草。而無一字之誤。後梁瑤峯入軍機。上命梁掌詩本。而專委公以政事。公遂不復留心。一日上召公及梁入。復誦天章。公目梁。梁不省。及出。公待梁。謦默久之不至。問之。梁茫然。公曰。吾以為君之專司。故老夫不復記憶。今其事奈何。梁公愧無所答。公曰。待老夫代公思之。因默坐斗室中。刻餘錄出。所差惟一二字耳。梁拜服之。故其得膺天眷。在政府幾二十年。而初無所譙責者。有以哉。

梁瑤峯

梁文定公國治。中乾隆戊辰狀元。入直南書房。累任學使。後以粵東事免。復擢湖南巡撫。入繼于文襄輔政。故當時有于梁之稱。其實公醇謹持躬。不敢濫為交結。與

文襄異趣也。其撫湘時，其家人索屬下賄不遂，故意阻其膳脯以激公怒。而公枵腹終日，初無怨嗟，惟吸烟艸而已。亦不知為其奴所給也。在軍機時，和相以其懦弱可欺，故意揶揄，至用佩刀雜公髮，以為嬉笑。公亦歡容受之，亦可覘公之度矣。

康方伯

康方伯基田，山西興縣人。久任江南，由縣令以至方伯，未出省界。故於河道頗熟。其任河道時，督率將卒防守河隄，動以軍法從事。其稽延時，立加枷杖，故人皆怨嗟。然河汎賴以無虞。邳宿河潰，公立埽上指揮士卒。俄而狂瀾大作，埽為之斲，眾為公畏。而公聲色愈厲，漫口因之堵塞。李香林河帥告人曰：康公真天人也。著有河防籌略，洞悉歷代水利。如在指掌。後人頗以為法。嘉慶己未，公任河帥時，弊竇山積，恐為公所揭出，故不肖官吏陰縱火焚積料以掩其跡。公因之罷官。後上復賜公太僕寺卿銜，命督辦河務。而為要路扼腕，不能施為。公因告病歸京邸。公素服海參丸，老年體力輕健，步履如飛。年九十餘始卒。

嵇文恭公

嵇文恭公璜，文敏公曾孫子也。少以大臣子，賜進士出身。數年即洊卿貳。公貌清

癯。遇事端謹。頗有識見。為史文靖公所推。繼程聘三相公為相。時于和以貪刻聞。而公以和平處其間。初無所建白。然和相素加讒慝。純皇帝召見。嘗戒之曰。曹莽之為。非人臣之所宜效。故公益加寅畏。年八十餘。重赴瓊林。為近代之盛事。時人榮之。然遇大事頗不苟。臺灣道永福初與柴義勇公齟齬。故加以萋菲之語。柴因之獲罪。福亦以貪酷故。同下獄。勾決日。廷臣皆左袒之。上顧公。公抗聲曰。永福為守土大員。不可輕縱。上乃勾決。聞者快之。公暮年。上有溫旨。遇軀不適。則免朝。公每早起。必自揉伸其軀。久之曰。今日舒暢。登朝如故人。皆笑之。然亦憂讒畏譏之至矣。

尹閣學

尹閣學壯圖雲南蒙自人。成丙戌進士。久歷部曹。始洊至內閣學士。時和相專擅於內。福文襄豪縱於外。天下督撫習為奢侈。因之庫藏空虛。民業凋敝。公夙知其弊。故上疏詳之。純皇帝為之動色。和相忌公所為。因奏即命公馳傳普查天下府庫虧空。而令侍郎慶成監之。慶固貪酷者。每至省會。初不急為盤查。而先遊讌終日。惟公枯坐館舍。舉動輒為肘掣。待其庫藏挪移滿數。然後啟之。權對。故初無虧絀者。慶以公妄言劾之。降為主事。公即告終。養歸。當其草疏夜秉燭危坐。竟夕抄錄。其弟英

代為之危屢關其戶公笑曰汝照常因暇不必代兄憂慮區區頭早懸之者市矣
汝代余養老親之天年可也其忠鯁也如此今上即位召之入都溫諭久之加給
事中銜以其親老命乘傳歸復與奏摺匣鑰命其遇事條奏久之乃卒。

完顏藩司

完顏藩司岳滿洲人。河帥偉之孫也。以甲科任獻縣令。頗著廉聲。後歷任為河南藩
司。時白蓮教初起。所在蜂擁。勢難阻遏。巡撫景安素懦怯。性復剛愎。故累為賊所驅
逐。惟公率嬴卒數千。守雙溝數月。公性慷慨。凡所經費。皆早裕為籌備。不問出入。故
人皆踊躍樂為之用。賊屢犯豫界。悉為公所擊去。自丙辰九月。至丁巳仲春。大小百
餘戰。無不堵禦得宜。時浙川有蠢動者。公告之景。景即命公捕獲之。公曰。崔苻小寇
易為撲滅。中丞可往奏功績。以抒朝廷之憂。襄漢間諸賊匪勢頗兇惡。非岱無以
禦之。景惑於初起者。難於抵禦。而雙溝有險可恃。因促公往。公急為掩擊。賊盡數就
擒。景貪其功。因棄雙溝而躡公後。誅殺難民。以大捷聞。遂膺伯爵之封。而公惟議敘
而已。其襄漢諸賊。遂乘其不備。大隊闖入南陽。由盧氏出武關。與川匪合。其逆跋遂
不可制。皆由景貪奪公功之咎也。公卒以勞瘁卒於軍。上悼惜之。余向得公行

狀其載浙川功頗詳。悉後為友人取去。不復記憶。故聊書其梗概。不足盡公之勳也。

吳達善

吳制府達善滿洲人。其先世由遼左移駐西安。初未至京都。以公貴始入。遷其族入旗。公以丙辰進士。累任陝甘兩湖雲貴總督。其督陝甘時。繼黃文襄之位。辦理軍需。無不循其章程。故屢邀上眷。注其督雲貴時。以謀宮裡雁珠鞍不遂。故乃妄加刑戮。以致搆起邊釁。頗為人所訾議。又乘其時豐庶。遂任意貪縱。民多怨畏。然其督楚時。繼愛必達寬縱之後。吏治玩弊。盜賊充斥。公乃嚴加整飭。命營員構線擒獲江湖大盜凡數百名。皆立加誅夷。懸其首於江干。累累相望。如旌旗然。故一時盜賊戢跡。不敢縱橫。商賈便之。亦嚴吏中之錚皎者也。

圖學士

圖學士塔布滿洲人。中戊辰進士。官至侍讀學士。公貌清癯。懶撻世情。中歲即以疾見告。築室於西郊外數里。籬扉茅簷。軒窗精雅。院中疊石為山。奇峯翠嶺。路徑迂折。饒多清趣。其後圃藝花種蔬。公親為之灌課。每春秋佳日。同曹宗丞學閔。遍攬西郊諸蘭若。嘗風雪中。共策蹇行。訪潭柘戒壇諸名勝。短裘笠帽。人望之如神仙中人。好

吟咏頗不修櫛字句。有靖節放翁之風。後即築墓於舍傍。病劇時。告妻孥曰。死即埋我於此。不必移置城中。反勞往來僕僕也。言訖端坐而逝。其夫人從公之志。門下士爭為弔唁。戒壇僧感其惠。築專祠以祀之。亦近日獨行之士也。

軍機大臣

國初設內三院外。其軍國政事。皆付議政諸王大臣。然半皆貴胄世爵。不諳世務。憲皇習知其弊。故設立軍機大臣。擇閣臣及六部卿貳。熟諳政體者。兼攝其事。並揀部曹內閣侍讀中書舍人等為僚屬。名曰軍機章京。其陞擢仍視本秩。然後機務慎密。議政之弊始革。其行走班次。皆視其班秩。故張文和在內廷。居傅文忠公上。近日董太傅諱亦居托相國津上。無論滿漢也。所掌銀印龜紐。藏於內府。有應用印者。皆立時請印出。大臣監視。用畢隨即繳還。蓋防偷換弊也。其下役皆選內府中之童子。惟司洒掃。舊例及冠時即更易。今因循日久。有久隸其役。而大臣喜其熟練者。仍姑留之。然猶呼為小公兒。蓋沿舊名也。

三品任軍機大臣

自雍正中。設立軍機後。皆尚書侍郎攝其職。惟乾隆乙卯。軍機大臣乏人。時戴文端

衛亨 吳制府熊光。以久任軍機章京。熟習政事。純皇帝特擢為軍機大臣。以資格故。賜三品頂戴。時人榮之。

軍機御史

軍機為樞密重地。非特有詔旨。不許擅入。故軍機司員。至今不叩年節禮。猶沿舊制。自和相專擅後。其所屬繁多。無地畫諾。故皆叢集軍機處階下待之。相沿日久。皆直入堂中回稿。視為泛常。故政事易為洩漏。今上習知其弊。特命滿漢御史二員。每日輪流立軍機處階上。有闖入者。即時糾劾。然後人不敢私謁。紀綱始嚴肅焉。

高天喜

高總兵天喜。其先為準噶爾部人。雍正中。為我兵所擄。有高姓者。撫以為子。故冒其姓焉。雙顴凸出。鬚髯蜩刺。每飲酒。日以石計。猶不醺然。當兆文毅公被圍濟爾哈朗時。事見後卷數月音問不通。當事者遣使偵之。時風雪凜然。人皆憚行。惟公慨然應命。往返數千里。以十日還。卒通兆公之信。上大喜。立擢游擊。未逾年。即任至總兵官。兆文毅公復被困黑水。公率本部兵援之。力戰而死。上甚悼之。

黃標

福文襄王督粵時簡練水師募奇才異能之士優為賞擢有守備黃標者由水師步卒以善泅水著其能於海洋中出沒月餘視波中之魚鼈歷歷可數王奇其才立推叅將後存至左翼鎮總兵官捕獲海盜尤多偉績云。

徐端

乾隆中自和相秉政後河防日見疎懈其任河帥者皆出其私門先以鉅萬納其帑庫然後許之任視事故皆利水患充斥借以侵蝕國帑而朝中諸貴要無不視河帥為外府至竭天下府庫之力尚不足充其用如嘉慶戊辰己巳間開濬海口改易河道糜費帑金至八百萬而庚午辛未高家堰李家樓諸決口其患尤倍於昔良可嗟嘆惟河帥徐公端自河工微員以廉能著受今上知特擢河東副總河尋復即真公久於河防習知當事之弊嘗浩歎國家有用貲財不應濫為糜費每欲見上悉陳其弊同事者恐其將積弊揭出所株連者眾多故每遇事尼其行使其終身不得入都 陛見以致抑鬱而死至貧無以殮而所積賠項至十餘萬妻子無以為活識者悲之繼公者為陳鳳翔以直省貪吏入貲為永定河道復有大力者為之奧援立擢河東總河其去天津縣令任未期年也後以妄放濬水故為張制府百齡所

効。上命立枊河上。聞者快之。鳳翔復遣其家人入都訟冤。當事者力緩其獄。得以釋回。未幾以驚悸死於河上廨中。無人不欣然也。

博爾奔察

純皇帝撫視臣庶。闊懷大度。有時加以狎謔。以聯上下之情。有內大臣博爾奔察侍

上最久。善嬉謔。辛未春。扈從南巡。至鎮江口。上放烟火。有被烟薰嗽者。博笑曰。

此乃素被黃烟所薰怕者。故望而生畏也。時黃文襄公督責過嚴。故公寓言之。又有較射而弓落地者。上震怒。公在傍曰。此皆因引。見故昨日射箭良多。以致臂痛。

不能引弓也。上乃釋然。又上一日較射。多不中侯。人皆畏懼。時修髯人至。公望

而笑曰。汪都統之弟至矣。汪都統札爾故修髯如戟。上撫掌大笑。上嘗行窄巷。

有步軍校積石為山於其廳側者。上望而問之。公駭馬奏。此步兵花園也。上大

笑。又上書福字。公立於側。上笑謂曰。汝亦識此中佳否。公應聲曰。知之。上所

書福。黑且亮也。上大笑。其諂諛皆若此者。亦東方朔簡雍之流也。

張太監

嘉慶初。有宮殿監督領侍張進忠者。人嚴厲。馭下整肅。好批小內監之類。人皆以當

巴張呼之。然性忠鯁。嘗奏事內庭。上偶敬坐。張捧黃匣不入。上詢之。張曰。馬有萬乘之主。卧覽天下奏章理也。上立正襟危坐。張乃捧疏入。上甚嘉之。其他端方之行。皆類是也。

恒公之清

宗室輔國公恒祿。簡儀親王姪也。素稟王之庭訓。故以廉潔著。其任吉林將軍時。俸餉外。毫無沾染。嘗危坐小閣中。將每歲出入之賬簿。手錄封之。人問之。曰。以待籍沒時。以為證也。故當時人皆畏法。產參甚旺。無敢私販之者。國家每歲增消數千票。遼兵餉賴以接濟。初不轉運太府財也。有當事者索貂褂數衣。公售其遼東舊產。以償之。初不索諸商賈。其清勵也。若此。

木果木之敗

明叅政亮謂余曰。兵家之事。宜於乘銳直進。若不審敵勢。坐失機宜。使兵心至於潰敗。雖欲振起。不易得也。往昔溫將軍木果木之敗。可為殷鑒。昔宋總兵元俊事見本卷乘勝直搗美諾。若當時厚集兵力。一鼓殲滅。金川可以早定。乃溫公狃於易勝。不復調檄各路兵馬。惟日與董提督天弼輩置酒高宴。額駙色布騰巴爾珠爾屢次勸阻。溫

公反以其煽惑軍心致登白簡。上召還額駙護軍統領伍岱者遼東驍士也。見温

公所為浩歎曰。吾聞速拙未聞遲巧。焉有屯兵賊境而日以宴會為務者。吾固遼海

健兒。未審兵法。有若此而能致勝者也。温公大怒。羅織伍以他罪致戍。以至人心不

服。温公性復卞急。遣綠營兵三五十人共取碣卡。有致傷者。温反督責之。人心益為

忿懈。海超勇公蘭察至。扣刀誚温公曰。身為大將。而惟閉寨高卧。苟安旦夕。非夫也。

今師雖疲老。使某督之。猶可致勝。若公終不肯出戰。不若飲刀自盡。使某等各竭其

力可也。温公拂袖起。亦無有所指揮也。又遷延月餘。賊人偵知我兵疲弱。乃整勁旅

數千。直攻營寨。我兵不戰自潰。海公初對敵。即詫曰。雲氣已頽散。不可與戰。余馬首

欲東。可與諸公期會於美諾寨也。因馳馬破圍去。温公方雅服督戰。為賊所擒。董公

天弼。牛公天昇。張公大經等皆死之。師遂大潰。我兵自相踐踏。終夜有聲。渡鐵鎖橋。

人相擁擠。鎖崩橋斷。落水死者以千計。吾方結營美諾。見潰兵如蟻。往來山嶺間。吾

遣人止之。潰兵知吾在。止者數千。吾為之收留犒賞。兵方安眠。適有持銅匣沃水者。

悞落於地。有聲鏗然。潰兵即驚曰。追者至矣。因羣起東走。勢不可遏。其喪胆也若此。

故吾與阿文成公收兵養銳。至逾二載後。軍心始振。然後用以克敵。大將用兵。慎勿

使其心顏喪至此也。明故宿將非久歷戎行者不能作此語也。因筆記之。以為易於談兵者戒也。

傅厚菴

乙卯春湖南苗疆蠢動。毗連三省。時福文襄王為滇督。因率兵討之。時貴州提臣花連布驍將也。立解永綏之圍。苗頗警畏。王惑於幕客言。欲養賊自重。以邀封拜。乃頓兵不進。與川督和公琳日夜飲酒聽樂。苗匪因玩視。王師煽惑勾連者日衆。加以山崖險阻。我兵不能寸進。又有不肖將士。興言以償贖地。苗益肆無忌憚。日相焚掠。二公受瘴相繼死。繼之者為明叅政亮。復以湖北教匪故。匆匆北歸。未及創懲。傅厚菴兼者浙江人。以吏掾仕湖南。習知苗中情形。文襄王重倚之。明叅政因薦公為鳳凰廳同知。公受命時。乾州鳳凰各廳苗民出沒。居民逃竄。公翦荆棘。招逃亡。團練鄉勇數月。曰可以用命。因率兵攻苗寨。苗目笑曰。往昔夙將如福王者。尚不敢櫻吾鋒。藐爾微員。何足污吾刃也。因轉戰數旬。苗民大敗。奔還其寨。公率眾圍之。苗民請降。公與之約曰。嗣後有闖入漢界者。吾當檄及誅之。有匿不與。吾必闔寨屠夷。不汝貸也。苗匪稽首。惟命是從。公乃厚加撫卹。曰。叛即吾仇。降即吾子也。忍不撫育之耶。苗民

益感激公在任十年。苗民無敢出寨滋事者。上大喜。加公按察使。因陞見歸。觸暑暴疾殂於途。上甚悼惜之。加巡撫銜以旌之。

艾公知人

英誠公艾星阿揚武勳王之孫也。同吳三桂入緬。擒獲明主由榔。有功績。任領侍衛

內大臣。初索相國額圖以椒房擅寵。明太傅珠時為侍郎。因交結索公。得以見知於

仁廟。艾公謂索曰。吾視明公才智。皆出君上。今雖因君見用。而其志殊有所畏。悞

蓋忌公同事故也。他日齟齬公者。必明某也。索不悟其言。其後明太傅招引高江村

徐健菴輩。結為朋黨。索終為其所擠。落職。抑鬱以終。果如艾公之料云。

木蘭行圍制度

木蘭在承德府北四百里。蓋遼中京臨潢府興州藩地也。素為翁牛特所據。康熙中。

藩王進獻。以為蒐獵之所。其地毗連千里。林木葱鬱。水草茂盛。故羣獸聚以孳畜。實

為天畀我國家講武綏遠之區。故仁廟每歲舉行秋獮之典。歷朝因之。繩法

先猷。永遠遵行也。其行圍時。蒙古喀爾沁等諸藩部落。年例以一千二百五十人

為虞卒。謂之圍牆。以供合圍之役。中設黃纛為中軍。左右兩翼以紅白二纛。分乘載

之兩翼末。國語謂之烏圖裡。各立藍纛以標識之。皆聽中軍節制。凡管圍大臣皆以王公大臣領之。而蒙古王公台吉等為副。兩烏圖裡則各以巴圖魯侍衛三人率領馳行。行圍之制有二。一行圍只以數百人分翼入山林圍而不合。謂之行圍。合圍之制則於五鼓前。管圍大臣率領蒙古管圍大臣及虞卒並八旗勁旅。虎槍營士卒各部。落射生手。齊出營盤。視其圍場山川大小遠近。紆道繞出圍場之後。或三十里五十里。以及七八十里。齊至。看城則為圍合。合圍後自烏圖裡處。虞卒脫帽以鞭擊之。高聲傳呼。瑪爾噶口號。按瑪爾噶者。蒙古語帽也。聲傳遞至中軍。凡三次。中軍知圍已合。乃擁纛徐行。左右指揮以俟。上入圍。則日已辰末已初矣。合圍數十里。漸促漸近。出林薄。至岡阜。離駐蹕。行營約略二三里許。惟視高廠處設黃幕。中設氈帳。是之謂看城。比至看城時。虞卒皆馬並耳。人並肩。廣場不過三里許。自圍墻外至放圍處。即重設一層。乃虎槍營士卒及諸部落射生手等。專射自圍內逸出之獸。而圍內例不准射也。日出前。上自御營乘騎先至。看城消息。俟兩翼烏圖裡藍纛到後。乃自看城出。御橐鞬諸扈從大臣侍衛及親隨射生手虎槍手等。擁護由中道直抵中軍。在中軍前半里許。周覽圍內形勢。瞭如指掌。而行圍之

疾徐進止。口勅指揮。凡二三十里間。射飛逐走。左右是宜。諸藩部落蒙古仰瞻聖武。莫不歡欣踴躍。以頌一人有慶也。或遇有虎。則圍暫不行。俟上看殫虎畢。然後聽勅而行。每圍場收至。看城則上即駐馬。惟觀諸王射生手等馳逐餘獸而已。或值是日。看城場內獸集過多。則奉旨特開一面以逸之。仍禁圍外諸人不准逐射獵罷。上迴蹕大營。謂之散圍。諸部落各按隊歸營。日甫晡。而一日行圍之事奏畢矣。若哨鹿日制與常日不同。上於五更放圍之前出營。凡侍衛及諸備差人等。分為三隊。約出營十餘里。聽旨停第三隊。又四五里。停第二隊。又二三里。將至哨鹿處。停第一隊。而侍衛及扈衛之臣。只十餘騎而已。漸聞清角聲揚。遠林呦呦。低昂應和。倏聽鎗聲一發。咸知聖武神威。命中獲鹿矣。羣皆欣然引領聽旨。調遣而三隊以次皆至。上前矣。其行圍所有奏章。皆俟上還營後披覽發出。毫無遺滯。或有時。上引諸文士賡唱終夕。以示暇焉。誠為良法。垂遠百世。宜所遵慕者。實非漢唐諸君較獵於上林驪山。惟知馳騁田獵之為娛者。所可比擬於萬一也。

勒相國保督黔滇時南籠諸苗叛逆毗連粵西時川楚教匪蠢動川黔將士皆檄以
北征滇中士卒微弱公善於撫馭雖騎兵走卒公皆能呼其名有功罪者立為懲賞
故人皆為之効死有宋延清者山東人其父為劉文清公與夫延清乃驍勇無敵勒
相視為骨肉每飲宴間邀與同坐延清嘗入苗寨殺賊竟日不出公設酒以待至日
暮時延清持雙刀背負首級十餘顆以繩貫之其甲裳盡赤彳亍而行如酒醉者公
望而喜手酌以賚之然後命其易服飲酒竟夕後延清復入苗寨為賊所害公悼惜
之其後為經略時所有帳下裨將如桂涵羅聲皋羅思舉馬瑜施縉等皆由將校擢
至開闢卒賴以平賊焉

錢辛楣之博

錢辛楣先生大昕江南嘉定人中甲戌進士幼聰敏過目成誦凡天文地理經史小
學算法無不精通所著經史答問數卷其暢發鄭賈之學直接嫡乳非他稍知皮毛
之可比者近時考據之儒以公為巨擘焉又習蒙古語故考核金元諸史及外藩諸
地名非他儒之所易及者成王言其在 上書房時質莊王嘗獲元代蒙古碑版體
製異於今書人皆不識因詢諸章嘉國師倩其繙譯漢文因命吾題跋端末吾方揮

毫先生過而見之曰。章嘉固為博學。然其譯漢文。某字句有錯悞者。吾有收藏元時
變巖所譯漢文。可取而證之。因歸寓。取原文出。章嘉所誤處畢見。故人皆拜服云。聞
其歸後。曾著元史續編。採擇頗精當。惜未見其本焉。其所著小學諸書。翻切頗為精
當。惟所講字書。株守許氏說文別解者。皆遭排斥。故取擇頗褊窄焉。

蘇昌

蘇昌。滿洲人。以繙譯進身。累任浙閩兩粵總督。其材具庸下。為僚屬所擲揄。坐擁苞
苴。初無善政。其子富綱。為滇督。幾二十年。其貪婪倍於其父。目不識丁。凡有文稿。皆
倩吏胥講釋。合省傳為笑柄。後卒以貪婪正法。人皆快之。然蘇昌督粵時。其屬縣有
巨室橫斃人母。反誣其子毆死者。其案久具勾決。本已下。昌疑其寃。復親鞫之。得其
實。乃上疏自劾。純皇帝獎諭之。因將縣令抵法。亦當時督撫之罕能者。秉節鉞者
宜法效焉。

佟國舅講左傳

佟國舅

國維為

孝康章皇后之幼弟。人謹恪。雖屢膺重任。不以攬權為要。暇時。惟

延學士講文藝。以為樂。故其歿後。憲皇帝手書仁孝勤恪之額。表於墓道。以旌之。

蓋有以也。其論最疵。謬者嘗告人曰。左邱明之文。果神妙。世間有瘋馬牛。共馳之。焉能相及也。人皆捧腹。而公未之覺也。

陸雙全

廣賡虞侍郎當權時。好畜聲伎。凡酒讌間。每擲纏頭以千百計。余嘗規勸之。侍郎殊不以為然。有陸郎雙全者。蘇州人。貌韶秀。為侍郎所鍾愛。每燕寢間。非陸侍側。則終夜不寢。侍郎被罪時。其聲伎皆逃竄。惟雙全隨之入獄。視其飲膳甚謹。侍郎臨刑日。雙全奔赴市曹。以重賄付劊子。速使其斃。免諸痛楚。及後雙全抱屍痛哭。幾殞。遂眠藁市側數日。送侍郎至北域。有其族人阻葬者。雙全執手罵之。卒葬。侍郎於其先人冢側。侍郎子遣戍。雙全復送出關。然後涕泣而別。亦令人中之守義者。故表出之。

漢軍用滿缺

漢軍國初時定制。皆用漢缺。至於六部司員。則自有專缺。漢人選法不致壅滯。而其陞轉亦易。雍正中。盡裁汰其額。併入漢員中。是以漢軍陞轉。倍覺煩難。純皇帝時。漢軍破格。有用滿缺者。范時紀曾任滿缺戶部侍郎。范宜清曾任盛京工部侍郎。李侍堯曾任熱河副都統。孫慶成曾任滿缺戶部侍郎。兼護軍統領。今上時。范

建豐曾任滿缺吏部侍郎。李毓秀曾任熱河都統。張百齡曾任滿缺刑部尚書。後調左都御史。皆曠典也。